

安陽縣志

金石錄

卷七至卷十二

安陽縣金石錄目

- 卷一 起商至東魏 商金五種周金二種新莽金一種漢石四種後趙石二種東魏石三種
- 卷二 起北齊至隋 北齊石九種隋石四種魏齊無年代石六種
- 卷三 起唐貞觀至開元十五年
- 卷四 起開元二十四年至周顯德元年 唐石二十九種五代石二種
- 卷五 起宋咸平至熙寧六年
- 卷六 起熙寧七年至元祐八年
- 卷七 起紹聖元年至金明昌六年 宋石三十五種金碑五種
- 卷八 起元初至大德二年
- 卷九 起大德三年至至大二年
- 卷十 起延祐元年至後至元三年
- 卷十一 起至元四年至至正四年七月
- 卷十二 起至正四年至十八年 元石刻四十八種金刻九種

安陽縣金石錄卷七

偃師武虛谷先生著

安陽縣知縣鐵嶺貴 秦校梓

施換塔石額記

存正書紹聖元年九月立在丈八佛塔上

夫佛之浩聖罔極至威威仰宇宙之間四維之中六合之內曷有莫不欽於聖者佛宣法暨出無邊無界羣氓持心演誦靡不濟拔於彼岸法教肇興建自周朝于是混沌之前我佛儀像已立在清虛廓落之外既產乾坤必安杳冥有形之內當時未可以化像於人間後來漸誘於寰海之中微迤邐透攝於萬類之上是以風化曠遠曩劫罔收人人志數有果有報家家常慕獲福獲勝緣流以顯上達於刀利之聖宮既除惡際下徹於阿毗之苦處是時高明善因無不敬崇者也如顯我丈八尊佛既從衝廬而踊出之時天有不奇之祥地有無涯之瑞想當時視日而轉轉晶輝觀月而別加清朗海水澄波山青秀麗一切有情之物無不瞻仰者是以四方黎庶之家見佛所出便乃齊心助聖遽立塔殿之基欲以歸安之處須建有福之地乃可遷佛如就平坦之中千人而莫能分毫搖動若陟山頭

一士而用力軋軋速進如迄山巔修成寶塔立在相州之境疆屈林縣□後年深日遠風摧雨塌乃塔門額累累有□今欲別安門額卻是相州西五十里安陽縣西龍山村人也□王隴西只於紹聖歲朱明之月因憶我佛詣於聖谷□心就禮如禮罷所仰聖因□塔依然未有所墮乃□門額綻壞當時便發願心欲換此門額日夜无寐速命高人去選其石且見西山峯峒及叟□□遠望烟蘿遍詣巉岵如風□□無有不到似崑崙岷嶽樣豈有不歷忽然門到□谷觀昊无涯瑞□万端是時只就此共匠人同謀一□□而作器且爲塔額耳願安石以後家榮日長福氣時增養蚕而衍厚重種稼而從累穎穎六畜雙孳門清永吉願子孫世世昌昌轉願皇王常登寶殿百僚卿相郡邑官員日添高品更願九族榮顯普天下人民咸受快樂矣今以狂序其言難可竭言前意所謂无智論幽深粵義之理不能搜源其趣願風雨順時不盡□宣者記矣

大宋紹聖元年甲戌歲季秋乙亥朔二十六甲子日換額相州安陽縣西龍山村獨施換塔額石李用

選石兼鐫字匠人許婆村衛弁婿史安

丹青處士象村郭政同施工食交口村眾人



相州安陽縣西段村習進士郭漸撰并書

案碑末署習進士郭漸蓋宋時士人以本科應舉卽以所業書名類如此者頗見諸石刻偃師金石遺文補錄宋修湯王廟記結銜鄉貢三禮張宗立與此並相符矣又丹青處士象村郭政据鄴乘載宋志章武管統村有象村足徵古邑名所流傳有自備方志之攷也

有隋相州天禧鎮寶山靈泉寺傳法高僧靈裕法師傳并序

存正書紹聖元年十二月立在天禧鎮

釋靈裕法師姓趙氏定州曲陽人也在幼童時每見沙門佛像必拜禮聞屠宰聲必加悲愴季七歲卽欲捐俗父母不許遂博覽羣書及十五丁父憂苦出哀瘠杖而後起事親篤孝編之史冊服畢遂往趙郡應覺寺出家後聞慧先律師在鄴都卽往從之會光已歿乃投道憑法師授十地論及華嚴涅槃等經皆晨夜研究博尋舊解闡發新異翕然稱之時齊方興釋典有法上者爲僧大統學者望風嚮附惟裕專精獨立不偶倫類後法上頗欽服之裕常與諸僧共談儒教旁設講席聽者同集兩得所聞覆述句義無一遺者自是擅名鄴下遠近師附俗呼爲裕菩薩多從之受戒焉裕持性剛潔器識堅明志存遠大不

局偏授每有傳講必恭恪勤厚延請乃赴既臨講席聽者莫不肅然自持一夕布薩說戒靜影惠遠法師造涅槃經疏詳練檢覆緣此傳裕師勵聲曰惠遠讀疏言是法師因緣眾僧說戒豈是魔說遠聞而憚之自爾罔不越筵稟於戒範女人尼眾莫敢面叅其嚴毅如此嘗與鄴下諸法師連坐開講齊安東王婁叡拜諸僧次禮至裕前不覺怖畏流汗退詢厥由知其戒行精苦遂奉爲戒師造寶山寺以居之裕通達三乘辯對乘機前後所講科目無常時同學者或譏之裕曰此乃大士之宏規也豈拘拘於常情哉後周滅齊廢毀釋教裕乃衣斬纓冠布經與同侶二十餘人潛遁村落晝誦儒書夜理佛經時歲饑穀貴裕乃造卜書一卷占者取米二升而已負米者相繼裕歎曰先民有言舐密勿傷臉於今矣乃取卜書對眾焚之更以所得供饋同厄及隋興復釋教始去纓經改襲舊儀真緝正紫五大色服正背之衣凡乘律則並不入室常服袈支纒過其肘人或謂之法師若此將非邀譽耶師對曰君子求名小人求利亦何爽乎謂者赧然心服開皇三年相州刺史樊叔略創立講會延集名僧有詔令立僧官叔略乃舉裕爲都統裕語叔略曰都統之德裕德非其德都統之用裕用非其用既德用非器事理難從叔略不聽裕迺潛游燕趙久之還居相州大慈寺開皇十一年文帝詔裕入長安令住興善寺延入宮掖與皇后獨孤氏歸

敬之禮求受菩薩戒師曰至尊是萬基之主靈裕乃凡庸比邱詎敢爲師也遜辭不已方始從受未幾詔爲國統裕因辭請歸於鄴文帝許之乃命左僕射高頴右僕射蘇威納言虞慶則撻管賀若弼等詣寺宣旨代帝復受戒懺罪并送綾錦衣服絹三百段助營寶山寺御自注額改號靈泉蓋取八山之泉師之上字合以爲稱聖意欲存師名之不朽耳旣還相州更住演空寺今澤明寺是也及仁壽中分布舍利諸州起塔多有變瑞時人咸以爲吉祥裕聞歎曰此相禍福兼表夫白花白樹白塔白雲豈非凶兆耶未幾果應獻后安養之徵眾始傳裕言爲信相州刺史薛胄所居堂礎變爲玉胄喜設齋慶之裕曰此乃瑠璃耳誠之慎之宜禳禍祈福胄不從後楊諒作逆胄竟坐累流之邊裔裕之明識皆此類也裕以大業元年終於演空寺道俗相與殯於寶山靈泉寺側裕所有經律疏義及詩頌雜集百餘卷行於當世嘗製寺十誥以法御徒終南釋氏宗而奉之其他可知也有弟子日光寺法礪慈潤寺惠休定國寺道昂并曇榮等皆以明律習禪一時宗匠各有別傳以載德業云元祐入稔秋九月天禧仕人牛彥景命余就第敷演旬有二日乘暇領徒遊目寶山攀蘿捫石越壑登峯矚巖隈靈龕尋林泉勝概考其名實雅符史傳至於元林塔像道憑石堂魏齊隆普之基周隋廢興之跡遺緒備存勒之琬石獨師威德猷頴拔眾表墻仞法

力莫大焉而杳無支提良用慨然乃募信士郭文真率眾於寺之東南隅岑麓之上建塔設像俾好古觀風之士瞻仰有歸矣皆紹聖元年十二月八日釋德殊叙并題額 習唯識論小童師慶書

相州衛弁洞天浩宗儀刊 修塔匠人張宣

案石刻後列釋德殊叙并題額習唯識論小童師慶書傳載靈裕嘗與鄴下諸法師連坐開講齊安東王婁叡拜諸僧叡北齊書有傳叡字佛仁皇建初封東安王此傳作安東與齊書異傳載相州刺史薛冑所居堂礎變爲玉冑喜設齋慶之裕曰此乃琉璃耳誠之慎之宜禳禍祈福冑不從後楊逆作逆冑竟坐累流之邊裔隋書薛冑傳漢玉諒作亂并州云朝廷以冑懷二心鎖詣大理竟坐除名配防嶺南道病卒蓋冑所爲詭譎觀望自貽罪戾碑乃歸於靈裕先識亦其徒黨炫耀言之不足爲依

案碑稱靈裕還相州更住演空寺今淨明寺也是釋德殊當紹聖時所段擊之寺据安陽集甲寅燈夕會淨明寺卽其地詩有聊趣淨符莊嚴地一看通衢自在燈寺蓋建於城內臨通衢不遠

施石峽龍頭物件記

存正書崇寧二年在水冶孝親寺

相州安陽縣大同鄉新安管水冶村孝親崇福院住持賜紫沙門□□手下正班鍾源□  
□□爲有師叔僧景普□□□□□□□□化不□安合社化緣人建立具施主如後  
石潤村鄭懷男鄭存施石硠一隻  
倪村任亮施龍頭一箇

南平村□人趙□□油□錢伍貫

黃口村□□哥施錢壹貫

水冶村李彥□化緣立年人□

崇寧癸未歲庚辰朔甲辰日安立記

諸多施主同共結緣

石匠衛弁安

案記分兩層上層刻記文云相州安陽縣大同鄉新安管水冶村攷太平寰宇記安陽  
舊有二十七鄉今三鄉然三鄉之名略焉不載余檢安陽集周君墓誌有藝感化鄉之  
文今又於此記得大同鄉是宋之三鄉已見其二矣新安管水冶村是宋制以鄉統管

以管統村猶得徵其遺也下層載石澗村倪村南平村黃口村並與宋志合

李智平建碑亭記

存行書大觀元年四月在元林禪師碑側

安陽縣南平村信士李智平游寺觀禪師碑建立已來歷年綿遠風日曝裂鰲座湮沒謹拾淨財命工出拔復新構亭蓋護以永其久伏冀存亡父母得悟无生眷屬安康同登覺道見聞隨喜發菩提心法界眾生獲安樂果宋大觀元季四月望日住持寶山靈泉寺僧福澄記南平村王氏男李智平弟惇冲齊悅從洞天郟宗儀刊

案李智平修亭蓋護寺僧福澄爲記始末如是與堯城令王進思碑龜跌已毀土人猶爲建置皆知古物淪棄之可惜蓋亦好奇喜事流也予故著之以表淳風

韓歧一姪六殤子墓記

存行書大觀三年十一月在治西水冶孝親寺

余弟朝散大夫紹之第三子曰俊胄字籲夫少穎悟力學有自立之志不幸染疾年十七卒於潁州官舍紹聖三年十一月二十四日也余之第四子謝和尙第五子賀老第六子金老第七子頑叟及余弟僖房二子皆在襁褓不育今以儀公大葬舉一姪六殤於新安

祖塋之東同瘞焉大觀三年十一月二十日朝散大夫知通利軍事管勾學事兼管內勸農事上騎都尉韓跂記

案韓跂記稱余弟朝散大夫紹之第三子曰俊胄字顓夫外有殤兒謝和尚賀老金老頑叟跂之子也又有僮房爲其弟之二子錄此以補韓氏譜所缺記稱儀公大塋東都事略忠彥本傳進左僕射兼門下侍郎封儀國公是也後題朝散大夫知通利軍事管勾學事兼管內勸農事上騎都尉韓跂記見北岳題名云安陽韓跂元豐六年仲冬知成德軍薊城縣得著已嘗恭謁祠下今復自祁之鼓城解官再遂瞻拜連治二邑皆獲善罷云云跂之歷官合此結銜可以略舉矣古人重其骨肉之感殤兒夭歿於外無不歸塋先塋近時有託爲偷生之說誑惑愚夫凡小兒女不幸短折遽棄溝渠或以敝席束草捲縛虛瘞路側行道悽感而彼昏不知安得以韓君誌殤兒之文語之使其疚心也乎

王宣造石香鑪記

存正書政和四年季春在天禧鎮永慶寺

大宋相州安陽縣感化鄉靈泉管光巖村天禧鎮王宣今發誠心率眾造石香鑪一座施

永慶禪院伏願

皇帝萬歲 重臣千秋

同施人李氏男呂明王真王喜王仲馬父馬密陳用馬信耿賽馬乃李儀李善侯進呂氏男王儀朝秀張文張□景善侯存呂德□□□書

施佛維□頭李氏

始建永慶禪院住持講經沙門惠安

政和四年甲午歲季春上旬三日建

匠人呂昌郎善造并刻

案記前題感化鄉靈泉管光巖村天禧鎮据安陽集故太常博士周君墓誌銘塋於相州安陽縣感化鄉祖塋之次卽此所題鄉名也今得之足以證明周君之墓實在今縣西南域矣又稱靈泉管光巖村鄰乘引宋志靈泉管有光巖南今無此名殆此題光巖村也鄰乘巖作巖又多南字蓋駁文

尊勝陀罷尼經幢記

存正書宣和三年二月立之城西關北



□□相州文殊寺彌勒院管勾賜紫尼文惠□□祖先二師記祖師俗姓陳法諱懿能遷  
□□自六歲出家至十八歲遇同天節□經得度爲尼授具足戒師能保身寡慾少疾享  
壽七十三歲崇寧八年正月初十日化于本院文惠營塋於郡城西開元寺庚域度弟子  
五人長曰文惠次曰元悟元進元慶元通逮宣和三年歲次辛丑二月初八日文惠再具  
石建幢安塋聊紀歲月以待於永遠謹記

案石幢諸面皆書經文惟二面有小記尼文惠述其具石建幢之由所云祖師俗姓陳  
法諱懿能至十八歲遇同天節□經得度爲尼神宗以四月十日爲同天節宋制遇慶  
誕度僧尼類如此也宋朝事實宣和元年春正月乙卯詔改尼爲女德士寺爲宮院爲  
觀此記在宣和三年寺稱文殊寺彌勒院管勾賜紫尼豈徽宗之詔暫行而隨停罷故  
足仍復其舊與記又云塋於郡城西開元寺庚域今開元寺基在西關西北是宋時相  
州之城與今並同而此幢置於開元寺之東殆後人移其故處與孝廉董化南訪得之  
榮事堂記

存正書在魏公廟龕置壁間宣和四年五月立

宣和元年秋七月相州守臣韓洽以疾求去詔以其子衛尉少卿肖胄爲直秘閣往代其

任上曰韓氏世官於相先帝詔也若父子今□爲守□□事矣缺聖訓之□又以鼎臣使記其所以惟三朝安社稷功成身退再爲相守熙寧八年薨缺神宗皇帝命其□子正彥□之又詔有司聽其官子若孫一八世世爲相吏□□邱缺今上皇帝□祖□父繼志念功所以褒表忠獻之□缺守相純彥去郡命王之長孫治繼之令肖胄缺侯以世而不以賢故論者譏焉缺止區區王謝轉側缺偶僅有遺後缺國家於韓氏不封建而貴不割土而缺業之餘前者濟其美後者受其缺宋無極可也龜□奄有殆不足缺者前有晝錦之記後有醉白之文□□臣缺少監賜紫金魚袋趙鼎臣記

通直郎提點河北□□□公事缺

中大夫提點河北東路刑獄公事缺

宣和四年五月二十日立石

案記文下截漫滅今紀其要者云宣和元年秋七月相州守臣韓治以疾求去詔以其子衛尉少卿肖胄爲直秘閣往代其任東都事略韓忠彥傳子治徽宗時爲太僕少卿出知相州以疾丐祠命其子肖胄代之與記州合惟官大僕與記稱衛尉少異至傳略書徽宗時以記文證爲元年秋七月蓋足以補史闕文以記言魏公熙寧八年薨缺神

宗皇帝命其□子正彥□之安陽集故壽安縣君王氏墓誌銘稱予第四姪尙書比部員外郎正彥卽其人也又言純彥去郡命王之長孫治繼之令肖胄□□史載子孫爲吏於相可徵如是後題少監賜紫金魚袋趙鼎臣記書體最雄秀惜不見書者名

韓悅道墓誌蓋

存篆書無年月舊藏縣署今移置魏公祠

案誌石蓋篆文凡九字題曰宋昌黎韓悅道墓誌銘字徑三寸餘渾勁有古法據王巖叟撰魏公家傳韓氏之先出自晉卿獻子之後以國爲氏子孫散居諸郡在昌黎者最爲著姓公卽昌黎之裔也据是則韓氏著籍在安陽皆以昌黎表其郡望是悅道爲公之支屬無疑矣惟志文爲人掩沒不可知其概略今以附於魏公之祠俾守者善護之

醉白堂記

佚

故魏國忠獻韓公作堂於私第之池上名之曰醉白取樂天池上之詩以爲醉白堂之歌意若有羨於樂天而不及者天下之士聞而疑之以爲公旣以無愧於伊周矣而猶有羨於樂天何哉軾聞而咲曰公豈獨有羨於樂天而已乎方且願爲尋常無聞之人而不可

得者天之生是人也將使任天下之重則寒者求衣饑者求食凡不獲者求得苟有以與之將不勝其求是以終身處乎憂患之域而行利害之途豈其所欲哉夫忠獻公既以相三帝安天下矣浩然將歸老於家而天下共挽而留之莫釋也當是時其有羨於樂天無足怪者然以樂天之平昔而求之公較其所得之厚薄淺深孰有孰無則後世之論有不可欺者矣文致太平武定亂略謀安宗廟而不自以爲功急賢才輕爵祿而士不知其恩殺伐果敢而六軍安之四夷八蠻想聞其風采而天下以其身爲安危此公之所有而樂天之所無也乞身於彊建之時退居十有五年日與其朋友賦詩飲酒盡山水園池之樂府有餘帛廩有餘粟而家有聲伎之奉此樂天之所有而公之所無也忠言嘉謀效於當時而文采表於後世死生窮達不易其操而道德高於古人此公與樂天之所同也公既不以其所有自多亦不以其所無自少將推其同者而自託焉方其寓形於一醉也齊得喪亡禍福混貴賤等賢愚同乎萬物而與造物者游非獨自比於樂天而已古之君子其處已也厚其取名也廣是以竇浮於名而世誦其美不厭以孔子之聖而自比於老彭自同於邱明自以爲不如顏淵後之君子實則不至而皆有侈心焉臧武仲自以爲聖白圭自以爲禹司馬長卿自以爲相如揚雄自以爲孟軻崔浩自以爲子房然世終莫之許也

由此觀之忠獻公之賢於人也遠矣昔公嘗告其子忠彥將求文於軾以爲記而未集公薨既塋忠彥以告軾以爲義不得辭也乃泣而書之

案宋刻醉白堂記久毀沒今檢明人重刻者有二一在韓魏公祠此卽在縣學明倫堂左龕置牆壁者也後列山人秀水尤嘉謹書其立石當萬歷二年甲戌二月

魏公生祠碑

佚

河朔訪古記公熙寧初力辭上宰再典鄉邦未平歲河北地震水災命公安撫四郡移鎮大名相人思之卽公畫錦坊故□築生祠以祠公廟昔有宋中書舍人王覲所撰碑兵毀不存

魏公祠堂記

佚

河朔訪古記彰德城中府學之西亦有公祠堂宋鄂州嘉魚令邱郈爲撰廟記其碑今置府學儀門下

宋故常君墓誌銘并序



水之南矣墓當近於是惜不可尋頃得漢碑曰得此誌常君其有厚幸與

面山亭碑

佚

河朔訪古記飛仙臺基在府治敏功堂後今構觀音堂其上臺北十餘步踰小巷後園有休逸臺基面山亭基金節度完顏熙載作養素栖其上今廢其碑尙存

案今俗呼老府街觀音閣當爲納新所見敏功堂後觀音堂遺址明人因而修之

高僧靈裕灑師塔銘

存正書無年月在天禧鎮

正像季運道襲窳隆徇物篤志播厥真風七財富贍五備圓通虛來實往派演不窮行爲世範德以內充天子宗事博約成功幻翳星隕廓徹太空於戲異世不與師同

相州十方開元寺住持傳戒賜紫惠海 監寺賜紫淨屐靈泉寺主福進福嚴惠安立

石 師慶書

案銘稱法師爲天子宗事以靈裕碑徵之居相州大慈寺開皇十一年文帝詔裕入長安令住興善寺延入宮掖與皇后獨孤氏歸敬之禮求受菩薩戒卽指其事塔銘石不

甚大中鑄銘爲大字效顏平原不失遺矩立石年月與靈裕傳碑刻當同時

金

寶山寺地界記

存正書大定九年三月在寶山寺

大魏武定四年

勅賜寶山寺常住白藥石山等地土東至石門西至林慮縣界分水嶺南至西善應村河北至水峪口河道

大齊天保元年

勅賜本寺白藥石山壹座四至依前

大隋開皇五年

勅賜寶山靈泉寺白藥石山等地土四至依前遠寺林木並是本寺祖師墳塋之地

大金天會五年本寺僧定沖法智等把寺投拜並不會離業地內青苗壹頃捌拾貳畝大定四年十二月內給到戶帖天禧鎮東菜園地并陸地計壹拾畝東至元十七郎西至道南至道北至元十七郎



先師於地內撥地叁畝與師姪

惠安充修院地寺南白藥石山一帶斜縮巒岫不等計地壹頃東至石羊峪西至木口嶺南至山脚北至采園峪口山

又次西沙石地壹段計壹拾叁畝伍分東西各至隔南至澗北至山又長峪坡沙石地壹段計地伍畝貳分東西各至山南北各至道并其余遠寺地土又貳拾叁段計壹頃柒拾貳畝靈柒毫

又承管王琪白石地四十畝入畝熟土納秋粟二斗物力錢十文

寶海立文字與寶山每年出稅錢二貫

大金大定九年歲次己丑三月十五日日本寺住持比邱法智立石

案地界石刻自魏齊隋金凡四代並有賜田內載白藥石山及石門水峪石羊峪木口嶺菜園峪□山諸名蓋亦古墟邑之可見者錄之以備方志之徵

元林禪師碑左側題字

案題字雨溜漸蝕損不可見惟一行正書題大金國甲午歲大定十四年十月十五日  
文可讀旁有正書微大上人名俱難諦審獨有游此及咸平年字

重修樂尚書廟記

佚

劉廣撰樂尚書廟碑記傳之故老墓上舊有公廟因河水泛溢金皇統間遂移於此見大定二十五年鄉貢進士山邦直重修廟記

彰德府安陽縣乞伏村重修唐帝廟記

存正書明昌六年六月建在乞伏村

前應奉翰林文字同知制誥趙秉文撰并書題額

夫道足以爲萬世法而澤足以爲萬世祀是將有以備制法關百聖參天地之化育後天地而不亡者矣故傑紂爲獨夫而仲尼得通祀景公有千駟而夷齊到今稱之德之在人焉可誣也况乎有聖人之德都天子之位首出百王之上而教傳百世之下者哉傳曰惟天爲大惟陶唐則之今夫日月星辰之昭回雷風雨露之振蕩寒暑陰陽之變化春生而秋殺明來而晦謝以終始萬物者豈非天之化也哉今夫君臣父子之懿仁義道德之實金木水火土穀之用壯者力於作而老者休於廬生者養而死者葬以衣被天下後世者豈非陶唐氏之遺化也哉陶唐氏之化在於斯民日用之間而墓能名其所以然非天也

耶然則去之千百世如將見之廟而宇之尸而祝之以鼓舞斯民者亦天也是非所謂不亡者耶嘗謂帝之德當世思之可也後世何自而思之賢者知之可也野人何自而知之舊邦饗之可也佗邑何自而饗之譬之說食必噍說穢必唾此亦人之情也有人於此暴其人之孤識與不識必環視而怒匍匐而往救之親與不親必相顧而嘆親非在已而喜怒爲用凡所以爲彼者爲我而已且夫帝旣外其身以先人亦所以爲天下後世是故教莫正於叙彝倫降二女以刑家則志在和萬邦矣□莫公於傳神器捨其子以禪舜則志在爲蒼生矣德莫大於振大災治水以命禹則志在利萬世矣功施於彼而利及於此恩加於當時而廟食於後世生而不以黃屋爲心沒而享崇軒之貴生而不以彩椽爲飾沒而都華構之安康衢古謠也後世里歌社舞簫鼓嘈雜有遺音者矣土劊土簋昔所御也後世山肴野蔌羶薌苾芬有遺味者矣易曰咸感也夫咸而至於有心則不足以有感矣相之西六十里而遠有聚落曰乞伏帝之祠在焉西挹太行北枕漳水古木森然上閱漢晉居人張伯厚等易其椽棟之朽折者而新之治其垣壁之毀缺者而復之廟成謁文於僕竊惟相古邑也若殷三甲之居相文王之居羸里皆有祠廟載在祀典獨唐帝之祠義若無所出意其神不相於茲土也顧嘗以爲帝之神如雨露之在天水泉之在地何所往

而不在獨惠往而遺此豈理也哉嗚呼以如神之智變化往來其有方乎以如天之仁徧覆包函其有殊乎以歷象授時之政安知不佐歲功以成物乎以博施濟眾之心安知不相明天子以惠茲惻獨乎生而厚其恩沒猶被其賜展敬乞靈烏可已也敢爲之銘銘曰鬼神睢盱伏羲受圖人文權輿彝倫旣叙五教旣敷唐文煥乎披昏抉塗藥民之愚有典有謨位非我娛萬民其孥丹朱其疎陸水其都人蟲其居吁嗟都俞恩漸于膚今其已夫祀焉忽諸遺祠路隔田婦耕夫或祝或巫白馬彤車清風肅如神來有無清漳之墟歲孰一區神游藐孤明昌有道千載同苻擊壤康衢走不知乎金之世陶唐氏之民歟

明昌六年六月望建

中州金石記安陽縣乞伏鄜重修唐帝廟記明昌六年六月立趙秉文撰並正書題額碑云相之西六十里而遠有聚落曰乞伏帝之祠在焉西挹太行北枕漳水古木森然上閱漢晉又云相古邑也若殷三甲之居相文王之居羨里皆有祠廟載在祠典獨唐帝之祠義若無所出予按太平寰宇記云永定縣本漢內黃縣地隋開皇十八年改爲堯城縣因堯所居之城爲名唐末改爲永定縣又云丹朱墓在縣東一里堯之子也攷永定廢縣在今府城東四十里宋省入安陽縣則其地祠堯實當以此丹朱墓亦在府

東南嚴邨趙秉文不能遠考故以爲義無所出耳南宋金元以來文人多而學人少往往如此獨怪金史稱秉文自幼至老本嘗一日廢書之說也

案碑身題彰德府安陽縣乞伏村重修唐帝廟記金史地理志彰德軍節度明昌三年陞爲府以軍爲名記在六年稱府與史相符又題銜前應奉翰林文字同知制誥趙秉文撰并書題額本傳載秉文明昌六年入爲應奉翰林文字同知制誥亦與碑符文內引傳曰惟天爲大惟陶唐則之易堯爲陶唐蓋以堯爲名臨文避之惟稱論語爲傳尙書序正義凡書非經則謂之傳言及傳論語孝經正謂論語孝經是傳也漢武帝謂東方朔云傳曰時然後言人不厭其言又漢東平王劉雲與其太師策書云傳曰陳力就列不能者止又成帝賜翟方進策書云傳曰高而不危所以長守貴也是漢世通謂論語孝經爲傳也以論語孝經非先王之書是孔子所傳說故謂之傳所以異於先王之書也據此記亦名論語爲傳殆本於此然唐宋以來如昌黎集燕喜亭記引傳曰知者樂水仁者樂山新唐書魏徵傳引傳曰君使臣以禮臣事君以忠劉貢父公是先生集序傳曰不知言無以知人也亦沿是稱因跋此并及之

彰德府安陽縣寶山靈泉寺覆釜峯新建石塔記

存正書無年代在白藥山頂

寶山靈泉寺在彰德府西南五十里古相州地也寺之西南一里山名曰其石巖巖舊有磚塔在上隋帝相救大將盧通之所建也歷年久遠磚形脫落本寺住持照慶照著廣募緣請置度二里白露村朱祥申氏捐捨資財創建石塔一座三丈五尺□然一新今覆釜峯重建石塔四圍東有硃砂仙影南望大河西有丈八古佛北有崆峒佛常共瞻仰□行善事敬其神孝其親忠君之道照慶徒法乘之功豈淺淺乎哉故書以爲記白藥山住持照貴道玉助緣缺

案塔記四面有字皆溜浸損剝惟北面可識文云彰德府安陽縣當是金時刻石也金史地理志彰德府散下宋相州鄴郡彰德軍節度治安陽天會七年仍置彰德軍節度明昌三年仍爲府以軍爲名是記稱彰德府當明昌時或在其後矣又稱塔爲大隋帝相救大將盧通之所建相救字殊不成文或畫石人謬誤耳盧通者卽豆盧通也隋書有傳通字平東高祖爲丞相尉迥作逆遣其所著莒州刺史烏丸尼率眾來攻逆擊破之賜物八百段進位大將軍此稱大將卽舉其官也開皇初進爵南陳郡公尋徵入朝以本官典宿衛歲餘出拜定州刺史後轉相州刺史建塔當在其時蓋已值開皇中矣

豆盧復氏而此題單題盧攷舊唐書豆盧欽望傳曾祖通隋相州刺史南陳郡公云高祖以寬曾祖萋魏太和中例稱單姓至是改寬爲盧氏然則豆盧得單稱盧非書文者遷易爲之也又稱置度二里白露村墟邑之存其名者尤可備徵如此故具書之

安陽縣金石錄卷七終



安陽縣金石錄卷八

偃師武虛谷先生著

安陽縣知縣鐵嶺貴 秦校梓

元

商王廟碑

存八分書無年代在縣治東南商王廟內

前中大夫刑王廟文學樂著撰

□山安峇 缺

茲地之所謂相者其來久矣在大河之北乃唐之冀方漢之魏郡也處恆衛兩閭清漳派其北大行阻其西六峯秀而明萬金通而利東西延袤幾二百里其川衍其野沃其氣候平其風物阜實爲地之名區勝壤也昔有殷十二葉河亶甲始都於此王之於殷也上則有太戊仲丁下則有祖乙祖辛祖丁盤庚其見稱於書者太戊以修德而殷朝消其異祖乙以巫賢而殷家奠其功盤庚以遷都而殷道復其舊是君之作豈特六七王在其間其賢可知也不然□質之□□□須□□□自成湯至於帝乙成王畏相在召誥則□茲殷

多□哲王在文武厥後王茲□□□在多士則曰自成湯至於帝乙罔不明德恤禩又曰亦惟天丕建保又有殷殷王亦罔敢失帝罔不配天其澤在多方則曰乃惟成湯以至於帝乙罔不明德慎罰□□□故家之所傳積德累仁之事□皆與焉謂之賢君可知者蓋亦有據云當王之居相也大振其治不過遵祖而已其懷民也必能寬信其行師也必本仁義其示勸也必慎賞罰其見德也必克宅俊至於子四窮則必推湯之惠及禽獸則必廣湯之澤此雖無明□蓋觀其人而知其政矣惜乎書無所載蓋逸書一篇秦火之而不存雖有孔壁之書李家之文皆科斗字時人無能識者故王之流風善政湮沒無聞焉文之書者河亶甲居相作河亶甲數字而已以此遺跡迨元魏置州曰相蓋取諸此也雖歷年□遠其土人思□□□德重相臺之始租卽闌闌之東殿而像之爲一方之所崇奉□□□□□□□□有年矣及遭申戌兵厄□火大然萬廬灰燼惟此廟□□□□存其神物護持有以致然也尋臻甫定城邑荒□其後人煙浸復顧瞻王祠益禮敬而香火之遂□之而增修前樓其門旁峻廡垣旣旒旣實有加於舊矣然素闕碑銘无文以識之一日同年張敏修忠傑□司倉□邦寧國安里人趙松壽之踵門而告曰商王之廟□□之祖也不可不記向以多故未遑□□今日敢請愚□謂□幽其□□可□□



學問又宣宗子傳正大元年進封守純爲荆王郡志選舉表載著於明昌中登第而中州集又載其詩安得謂爲唐人乎此碑之刻雖不著年月以著攷之則在明昌後矣案碑自鄴乘節錄久不見全文今據碑增補雖未盡還舊觀亦尙存其概碑首題前中大夫荆王府文學樂著撰次行題□安嘗□蓋爲書文者名氏中州金石攷以爲樂著八分書失之不審矣碑云文之書者河亶甲居相作河亶甲數字而已以此遺跡迨元魏置州曰相蓋取諸此也攷元和郡縣志後魏孝文帝於鄴立相州初孝文幸鄴訪立州名尙書崔光對曰昔河亶甲居相聖皇天命所相宜曰相州孝文從之蓋取內黃東南故殷王河亶甲居相所築之城爲名也通莫太平寰宇記並作道武置相州取河此卽亶甲居相之義非是宜從元和志作孝文此卽碑所據碑已失其年月惟後有甲辰□月二十四日字攷金史荆王守純傳哀宗卽位正大元年正月進封荆王則樂著爲荆王府文學當值其時依紀年通攷推之哀宗亡後甲辰實蒙古太宗之十五年于時金亡久矣故題銜稱前中大夫荆王府文學蓋由於此宜列入元碑之首非金時立石也

老君觀鐘識

存正書中統四年八月在治西老君觀

案鐘識惟三方有字皆陰文第一方云皇帝萬歲文武千秋次云彰德路功德主宣授轉運使常宣授轉運副使李二人並氏而不名次云本府天□宮提點趙中統四年八月初一日造据元史地理志太宗四年立彰德總帥府領衛輝惠宗二年割出衛輝以彰德爲散府屬真定路未稔鐘識在中統四年何以猶稱爲路或由鑄造人仍以舊名名之也宣授轉運使常見中統五年創塑東嶽行宮二聖后記有宣授彰德府路轉運使常德同卽其人德同字仁卿轉運副使李見大德七載韓氏新塋世德碑稱奉直大夫前彰德路轉運副使李揆篆額者是也

長興禪寺鐘識

存正書中統四年八月在城內西北觀音堂

案鐘識陰文上鑄皇帝萬歲宰臣千秋入大字下爲八方文云彰德府在城十方長興禪寺首座僧覺布提點僧惠洪化緣僧淨□同化緣僧惠□住持傳法嗣祖沙門福會都功德主宣差達魯花赤扛右伯娘子也□匠人□□□中統四年八月初一日元史地理志元太宗四年立彰德總帥府領衛輝二州憲宗二年割出衛輝以彰德爲散府屬真定路此識當中統四年爲世宗建元之癸亥歲其時彰德爲散府故云彰德府也

宣差達魯花赤不言府縣蓋承上府言之卽爲府達魯花赤百官志文散官由一品至五品爲宣授散府達魯花赤秩正四品當稱宣授而云宣差當是地方長官有此宣差之文也

剏塑東嶽行宮二聖后記

在正書中統五年七月立在治城南東嶽廟後殿壁上

神鉦胡祗通書

昔周豐有言曰墟墓之間未施哀於民而民哀社稷宗廟之中未施敬於民而民敬無它其處所使然殆可知已是廟也東嶽天齊仁聖帝之行宮固當尊其廟兒聳其瞻視使人起敬起愛此則正殿誰存而墻宇半摧玉座雖有而階砌已壞惟餘聖帝一尊而已一日宣授彰德路都轉運使常公仁卿同夫人劉氏來謁是廟下車焚香再拜□□□□□□□□□□人劉氏慨然有興修之志乃相謂曰既有□□□□有聖后退而質諸典記果有二后一曰淑明皇后一曰太皇后卽日命高手待詔創添左右皇后二侍從六因而增修聖帝之像儼然人望而敬之又爲起建華臺補完墻宇加之承塵窻戶凡事一新是歲饑饉相仍百物踴貴其粧塑價直暨人功食用約費白金百有餘兩了無難色意者使相人歲時奉

祀以爲祈禳之地可謂仁於用心亦賢矣夫梨莊老人劉景申于是乎作記

宣授彰德府路轉運使常德同夫人劉氏中統五年七月朔立石

案記石中微有斷文前列神鉦胡祇遜書後列梨莊老人劉景申記祇遜見元史其字詔開此云神鉦蓋別號也中統初張文謙宣撫大名辟員外郎明年入爲中書詳定宮碑立於中統五年祇遜已有官階而置之不書雅量非常矣碑述轉運使常德同暨夫人劉氏塑像始末文無可紀書體頗遒緊孝廉董化南親訪得之

三泉福勝禪院偈禪師塔銘

存正書至元二十九年三月在三泉寺

承事郎國子博士高書訓撰并書

□□衡篆額

洹水西山之陽曰三泉劍脊諸峯左右映帶正與寶山相直中有梵宮名福勝第一代文侃實住持之師乃澤州晉城賀撥店傅氏子生有宿緣總角時羣兒聚戲輒作禮佛誦經狀覲輦血郎惡之自童真出家禮裕州寶泉山下妙覺寺住山□師慧諸明徹飽習經論叢林敬服九齡受具足戒汴梁亡北渡河挂錫廣平之安樂寺始明禪理遂參松溪老繼

參雲門下洪濟老時洞林秀老在成安興化寺廼往參焉昏不合其契聞彰德天寧寺南堂顯和尚機鋒雷震徑往問道南堂曰來何自曰興化曰興然一句如何師大笑南堂又曰何所學得來師曰不從千聖得豈假萬機求針芥既投心地開朗相隨至洛水太平寺遂得法會眾開堂拈香出世傳道日廣相州三泉舊爲名利然未知何代所建兵燹來鞠爲墟矣惟前殿後堂欹傾踈罅於荆榛瓦礫之中幾爲頽圯寺監慶乃請師主灑日經月營會不三數歲向之催敗者煥然一新齋廊庖帑之所咸法而備於是朝鐘暮鼓講席駢闐恆不下三十餘輩師談演妙道諄諄無倦故四方來者樂從之遊無何開州崇福寺智監聞師之風具疏敦請既至荒疏寂寥無以供眾養欲爲置恆產力弗能勝忽一老人持白金二百緡來施亦不通姓字師喜受不辭曰吾願足矣遂買田五百畝人謂陰相然無何師退席復歸三泉將終身焉晨起鳩門徒告曰死生常理吾自知之昨夢神人召我入火宮吾其亡乎援筆書頌而化故末後有請我三泉入火宮之句實中統建元八月八日也壽五十有八夏臘三十餘載茶毗之際牙齒不灰舍利尤異襲祖弟子了和以至元廿八年三月廿五日建塔於南平岡之首且來乞文紀師之行爲作銘曰

隻履西歸分流五派叢林滋蕃遍十方界千百餘年家風宛在臨濟一支於今爲最咄哉



此雄出來捏怪吹毛利劍批風迅快持靜深山雷音漸大隨緣鼓笛自家爐鞴做箇道場  
有何妨礙擺手便行擲下皮袋勒破真空更出真外白塔巍巍羣山映帶陵谷變遷靈骨  
無壞

大元二十九年三月十有五日住持林峯了和了舜了然法孫普周普圓等立石

安陽李讓李郁鐫

案碑前題承事郎國子博士高書訓撰并書書訓見河朔訪古記韓魏公國朝重建廟  
碑一通晉州判官高書訓撰高公太原人官至國子博士故尙書高鳴雄飛子也此碑  
題有國子博士正與納新所記合

長興寺小鐘識

存正書至元三十年十月在治西北觀音堂供几上

案鐘識陰文云臨安府富楊縣長受邨第四保龍掛西杜君住男□人妻□十□□五  
方□一个彰德府長興寺報父母恩至元三十年十月十五日元史地理志杭州路宋  
高宗南渡都之爲臨安府至元十三年平江南立兩浙都督府又改爲安撫司十五年  
改爲杭州路總管府二十一年自揚州遷江淮行省來治於杭改曰江浙行省蓋世祖

立國屢易其名不聞號臨安府疑既立行省後杭州復仍舊名史不悉錄猶幸見於鐘識得補其闕也富陽作富楊鑄作之訛

### 天慶宮香鑪識

存正書至元三十一年五月在東月城

案鑪識彰德路天慶宮香爐安陽縣□冶北鎮冶牛珪焦景賢積善李模焦德顏悚謹鑄至元三十一年五月十五日付興造鑪既存置

關帝廟蓋元天慶宮遺址卽在此矣冶上空字當爲銅字

### 老君觀寶鑪識

存正書至元三十一年八月在老君觀

案鑪識云中順大夫彰德路總管府達魯花赤兼本路諸軍奧魯總管府達魯花赤兼管內勸農事也里不花等伏爲天色亢旱苗稼焦枯低就本府西關上清正一宮祈雨累次感應□施寶鑪以伸答謝時甲午至元仲秋吉日行符純靜抱一□真人文吏□□匠人付政元史百官志諸路總管府至元初置二十年定十萬戶之上者爲上路十萬戶之下者爲下路當衝要者雖不及十萬戶亦爲上路上路秩正三品達魯花赤一

員總管一員並正三品兼管勸農事江北則兼諸軍奧魯攷彰德路爲下而設官與上路同蓋以地居衝要也此云兼諸軍奧魯亦江北之制如是並與史同結銜稱彰德路是彰德既廢爲府於時又陞爲路地理志至元二年復立彰德總管府領懷孟衛輝四州四年又割出懷孟衛輝仍立總管以林慮升爲林州復立輔岩縣隸之是也最末書年以甲午冠至元之上是爲世祖三十一年七月成宗猶未改元故以歲名加於年號上蓋變例也

### 秦城起宅記碑

存正書元貞二年四月在治西北觀音堂塔上

案碑石二尺餘陽面書天地日月國王父母八大字陰面有秦城起宅記後書元貞二年四月日吳淵刊魏齊間造像石多以師僧與君親並列此獨不蹈其習碑旣云宅記宜寘之宅中未稔何時轉移塔上殆土人便附於此賴以不致殘毀亦一幸也

### 韓魏王新廟碑

存正書大德二年十一月立在城東南魏公祠

應奉翰林文字承務郎同知制誥兼國史院編修官高書訓撰并書篆

賢王疆理西域食邑於相廼命大臣宴只吉台氏系閔吉刺貴族也其子懷遠襲爵懷遠沒嘉議襲之嘉議讓其叔太中而陞侍御史太中公蒞職數年政平訟簡風俗恬熙吏習廉畏民樂生活禮文之事多所興舉一日詢諸耆宿曰韓忠獻以司徒判相三榮其鄉澤被斯民固已厚矣嘗聞聰明正直死當爲神能護一方故聖王之制法施於民以勞定國能禦大災能捍大患者載在典秩咸得廟祀報本之情於斯可□□世申之妥靈揭虔王以中正至大之氣惠及荒服功施社稷皦如日星昭昭然不可掩四者皆備宜爲神享祀將廟貌尸祝可乎僉曰可遂以已偉先僚佐忻然贊助□□□獻力斤陶鍛場各進其技肇城巽陬之祠堂毀於兵燼今仍故基建廟設像焉曾不踰期巋然整肅九聖帝明王忠臣烈士廟而祀之明詔也王之忠烈正合祀典固不待黽勉而爲尙恐報之之未稱且古守令苟有遺愛猶立生祠頌德政或貌而事蓋感之深思之至矧兩朝顧命元臣聰明正直而一者哉茲魏王廟所由作也世之人皆以死生禍福警動者敬畏雖殫財竭力奔走俯伏不厭蓋欲徼福免禍爲帝王何嘗以死生禍福警動人而太中公欽慕如此者何政有以效其夷險之節又將勵天下後代爲臣子者忠與孝也推公之□豈淺淺耶朝廷方重世臣它日復屈鉤軸垂紳正笏臨大節決大議置大器於安寧地與王之事業相侔

庶不負尙友之志已戊戌冬廟告成太中公命走紀始末愧報無容再拜辭曰歐陽司馬二公之說蔡端明之字光燄萬丈照映千古太山北斗企仰誰及必復撰述當求名筆走□人庸贅語雖然第謹歲月敢不惟命是聽或者難曰稱王非禮也出於徽手安取瀆是大不然徽雖失政王何與乎追封公論也徽亦何與焉王之勲業兒童皂隸其孰弗知初論儻異同必未免青蠅之汙旣公且正是以書之於策世莫得而議寧可以徽宗少貶歟至於諷慈壽還政叱允弼下殿先賀朋黨禍起皆斤逐獨得安然此又諸名公不及遠甚烏虜王去世二百餘年名愈彰功愈光民愈不能忘太中公自懷遠凡四世幾六十載誠信於民民被其澤不爲寡矣後之致報當如何雖十世百世豈易量哉其財幣之數工役之計細務也不重云姑筆興建之原仍作歌以脩祀王韓琦字稚圭相州人上世葬安陽之西俗呼爲上下墳其辭曰

望太行兮蒼蒼渺漳水兮茫茫鬱元氣兮久秘藏維降神兮生忠良羗與一代兮爲禎祥輔兩朝兮日月光三衣錦兮榮故鄉倏騎鯨兮歸帝旁藏衣冠兮涇之陽澤流後世兮奚能忘繫太中兮民之綱建廟祠堂故基兮設儀像乎中央俾王功業兮闡然而日章芝室兮椒房桂爲棗稅兮菌爲棟梁芰荷衣兮芙蓉裳蘭有秀兮菊有芳靈之格兮風露涼月

皎潔兮雲飄揚牙纛肅兮旗旄張鏡鼓嘲轟兮鸞鳳翔覽九州兮遊八荒擁侍從兮皇皇  
搖環珮兮鏘鏘屈新廟兮歆我觴荔丹兮焦黃薦肥腍兮羞馨香佑我邦家兮庇護一方  
雨暘時若兮豐年穰穰願公子孫兮世世其昌

提控案牘任昭 將仕佐郎知事王宗閔 從仕郎經歷馮傑

承德郎彰德路總管府判官兼管本路諸軍奧魯李鑑 奉議大夫同知彰德路總管  
府事兼管本路諸軍奧魯祖福

少中大夫彰德路總管兼管本路諸軍奧魯總管管內勸農事張祐

太中大夫彰德路總管府達魯花赤兼管本路諸軍奧魯總管管內勸農事也里不花

元大德二十年十一月二十六日立石監造官錄判張文舉

府吏馮敏 縣吏張從簡

安陽李讓張珪刊字

案碑前題銜應奉翰林文字承務郎同知制誥兼國史院編修官高書訓撰并書篆書  
訓高文忠之子鄴乘引舊志文忠子易訓書訓詩訓皆知名今見於碑者此其一也文  
云賢王疆理西域食邑於相廼命大臣宴只吉台氏係闕吉剌貴族也其子懷遠襲爵

懷遠沒嘉議襲之嘉議讓其叔太中公而陞侍御史太中公蒞職數年卽彰德路總管府達魯花赤也里不花也不花元史無傳故其先襲爵亦不可攷至所謂賢王食邑於相者竟莫知爲何王矣記言魏公追封王出於徽手宋史本傳致和五年追論定策功加封魏郡王是也後列提控案牘任昭將仕佐郎知事王宗閱從仕郎經歷馮保承德郎彰德路總管府判官兼管本路諸軍奧魯李鑑奉議大夫同知彰德路總管府事兼管本路諸軍奧魯祖福少中大夫彰德路總管兼管本路諸軍奧魯總管管內勸農事張祐總管府官及其屬略見於此惟提控案牘元史百官志諸路總管府其屬不見此員至散府設提控案牘一員然大德二年碑尙稱路則又非散府矣

韓魏王新廟碑陰

存正書

彰德路各州司縣官吏耆老人等

施石柱少中大夫順德路總管兼本路諸軍奧魯總管兼管內勸農事郭儀

施禮府吏完顏從益謝輔田伯耕張秉恭張英張易李居簡開爵馮亮鄭彝周彬鄭惟英徐敬郭邦彥府典史孫士宏魯致遠

林州達魯花赤訥海州判謝瑞吏目蓋信司吏賈謙張遜張起史益蕭璧王從周

安陽縣縣尹朱祐縣丞郭惠吉縣尉李榮典史李允中司吏鄭時中夏誠德孫思恭趙明德魏思忠

湯陰縣達魯花赤鎖驢縣尹邵惟禎主簿朱□文縣尉閻闢女典史任珪司吏牛近仁邢毅張忠政陳元用宋讓

臨漳縣達魯花赤拜不花縣尹張元亨縣尉王義伯典史夏郁司吏孫厚朱祥何松張克敏李友諒

錄事司錄事王世舉錄判張文紀典史任楫司吏張瑞程翼馬相祖王孝祖

站赤所提領□祐亢均李進

崇盈倉大使忙哥撒兒副使劉源

安陽銅冶焦社長郭袞焦德楊榮杜茂孫濟李□趙□王張謙宋社長鮑仲王通艾□薛時舉張楫韓璧南王村社長趙德韓進

施木植朝官村提領張□張昭石井徐安東流寺李義李順高村申仲通北蘇度吳興王和蓋村柴福將村黃用宋興宋楫宋聚李祐劉寬麻水村耿明賈山趙彥張福賈景山東



賈店張□高平村馬聚馮義賈貴賈珍賈山趙德程進張珪張元張林張進劉德馮伺宋資李德楊元鄭信鄭林孫平村□苑德張慶劉成張社長劉義王宣劉彈壓劉成劉順于聚郝玉邵村許潤謝聚王用王亨宋喜許成張起程祥

助緣施禮安陽縣達魯花赤李蘭奚錄事司達魯花赤黃頭府典史馬夏府典史梁琛修廟人匠木匠都作頭苑謙堊匠都作頭劉傑塑匠都作頭王德明王璧粧畫都作頭王璋畫匠都作頭吳敏安陽縣木匠都作頭李用

天慶宮提點劉志林下院□□女冠□王守真門弟看廟侯守堅  
錄事司儒學教諭董業書

案碑列林州達魯花赤及安陽湯陰臨漳各官吏元史地理志至元四年割出懷孟衛輝仍立總管以林慮升爲林州今碑所書林州是也然碑題彰德路各司州縣官吏耆老人等又附順德路總管郭儀一人當因其施石柱義不可沒故爲書之碑又載站赤所提領崇盈倉大使錄事司儒學教諭元史兵志站赤者驛傳之譯名也其官有提領與此同惟百官志不見崇盈倉名據鄴乘載崇盈倉在府治東北是明亦因元舊制設倉此當城內所置卽志所謂總管府有倉大使一員是也若志載河倉一十有七淇門

倉下卽載伏恩又諸綱內亦有安陽是伏恩倉屬安陽今城東南伏恩村距衛河僅三里伏恩倉以村爲名而府縣志失錄殆亦疎矣碑後載銅治艾□南王村朝官村石井東流寺高村北蘇度蓋村將村麻水村東賈店高平村孫平村邵村諸名今並同案碑載林州自達魯花赤納海州判謝瑞吏目蓋信凡三人湯陰自達魯花赤鎮驢縣尹邵惟禎主簿朱□文縣尉閻閻女典史任珪凡五人臨漳自達魯花赤拜不花縣尹張元亨縣尉王義伯典史夏郁凡四人皆方志所未及收故予存金石刻以備職官之表非獨安陽一縣拾其遺也

安陽縣金石錄卷九

偃師武虛谷先生著

安陽縣知縣鐵嶺貴 秦校梓

聖旨碑

存正書在府西關白龍王廟大德三年五月

長生天底氣力裏皇帝聖旨道與隨州城縣鎮村寨達魯花赤每大小官員每去的來的使臣每已先底聖旨裏脫因也里克溫先生答失蠻不揀那箇大小差發休着者天根底禱告祈福祝願者道來的聖旨躰例裏彰德府咱每的上清正一宮有的李大帥爲頭先生每根前大上老君的道子休別了者告天與咱每祝願祈福者爲這般上頭把着行踏的聖旨與來這先生每的宮觀房子裏是他每的使臣休下者鋪頭□祇應休要者地稅商地休與者這的每田地水土不揀甚麼東西揀那呵誰休倚氣力奪要者這的每休道有御寶聖旨道呵俺每聖旨根底別箇底沒躰例勾當休做者做呵更不怕那甚麼聖旨俺每的猴兒年六月十四日開平府有的時分寫來

長生天底氣力裏大福蔭護助裏皇帝聖旨城子裏的達魯花赤每根底管軍的官人每

根的管民的官人每根的軍人每根的過往使臣每根的民戶根的宣諭的聖旨成吉思  
皇帝哈罕皇帝聖旨裏和尚也里可溫先生答失蠻每除地稅商稅不揀甚麼休當者告  
天祈福與者莫道來如今依先聖旨躰例裏除地稅商稅外不揀甚麼差發休交當者告  
天祈福與者莫道彰德府有的上清正一宮洞淵普濟廣德真人正一清的徒弟通玄大  
師文德主把着行的聖旨與來這的每宮觀裏房子裏使臣休下者鋪馬祇應休當者地  
土菌菓水碾解典庫浴房不揀甚麼休奪要者這先生每有聖旨莫道沒躰例的事休做  
者做呵他不怕那甚麼聖旨猴兒年七月二十八日上都有的時分寫來

長生天氣力裏大福蔭護助裏皇帝聖旨軍官每根的軍人每根的城市裏達魯花赤官  
人每根的來往的使臣每根的宣諭的聖旨成吉思皇帝哈罕皇帝聖旨裏和尚也里克溫  
先生每不揀甚麼差發休着告天祈福者莫道來如今依先聖旨躰例裏不揀甚麼差發  
休着告天祈福者麼道這彰德府有的敕賜大上清正一宮住持的純靜抱一輔化真人  
文德圭崇真源道玄應法師太一嗣師劉道真根的執把行的聖旨與來這的每宮觀殿  
宇裏他每房舍裏休下者鋪馬祇應休與者田產池沼水土菌林碾磨不揀甚麼他每的  
休強行奪要者這的每却道俺有聖旨莫道無躰例勾當休做者做呵他不怕那甚麼聖

旨俺的鷄兒年二月初一日柳林裏有時分寫來

上天眷命皇帝聖旨鑄金象物古聞不若之歐蘊藻薦芬上有克誠之享□爾光□演道  
通妙法師本宗三代宗師太一嗣師劉道真□標霞室召應廳車行乎世祖之淵東祀復  
漢家之慈典姑射所居無疵癘漆園之語可徵壺翁以術役鬼神玉府之符斯驗灼著祈  
禳之效允惟眾庶所推雨暘屢應於零壇祆異莫逃於犀燭正一五雷之法自南土既克  
闡於芳猷太一五福之位蒞中央尙丕承於靈貺特頒異數庸進仙階賜號演道妙應  
一真人本宗三代宗師主太一祀事如故主者施行

大德三年五月 日

案碑分四層第一層猴兒年六月聖旨二層猴兒年七月聖旨三層鷄兒年二月聖旨  
皆以國語製文便於通俗行之元史秦定紀詔曰薛禪皇帝可憐見嫡孫裕宗皇帝長  
子我仁慈甘麻刺爺爺根底封授晉王統領成吉思皇帝四個大幹耳朵及軍馬達達  
國土都付來依著薛禪皇帝聖旨小心謹慎但凡軍馬人民的不揀甚麼勾當裏遵守  
正道行來的上頭數年之間百姓得安業在後完澤篤皇帝教我繼承位次大幹耳朵  
裏委付了來已委付了的大營盤看守著扶立了兩箇哥哥曲律皇帝普顏篤皇帝姪

頑德入刺皇帝我累朝皇帝根底不謀異心不圖位次依本分與國家出氣力行來諸王哥哥兄弟每眾百姓每也都理會的也者今我的姪皇帝生天了也麼道迤南諸王大臣軍士的諸王駙馬臣僚達達百姓每眾人商量著大位次不宜久虛惟我是薛禪皇帝嫡派裕宗皇帝長孫大位次裏合坐地的體例有其餘爭立的哥哥兄弟也無有這般晏駕其間比及整治以來人心難測宜安撫百姓使天下人心得寧早就這裏卽位提說上頭從著眾人的心九月初四日於成吉思皇帝的大幹耳朵裏大位次裏坐了也交眾百姓每心安的上頭赦書行有正與此碑相類是卽位建元之詔尙如此矣攷元令式者當知其用意之存也四層稱大一嗣師劉道真行乎世祖之淵衷祀復漢家之盛典云云元史釋老傳大一教者始金天眷中道士蕭抱珍傳大一三元法錄之術因丕其教曰大一四傳而至蕭輔道世祖在潛邸聞其名命史天澤召至和林賜對稱旨留居宮邸以老講授弟子李居壽掌其教事至元十一年建大一宮於兩京命居壽居之領祠事且禋祀六丁以繼太保劉秉忠之術此碑稱大一嗣師劉道真亦其徒黨也又云祀復漢家之盛典卽指大一祠事而史皆佚之不書碑在今西關白龍王廟墻西据所載爲上清正一宮蓋元之遺址世人久無知之遂致方志疎漏可慨也

安陽重修漢尙書樂公廟記

存正書大德五年十一月立在縣東伏恩村

翰林直學士朝列大夫知制誥同修國史劉廣撰并書

承務郎太常寺丞李元禮篆額

樂尙書巴者字叔元魏郡內黃人也縣嘗隸相州後還魏郡公墓在安陽之伏恩里故復爲相人焉公生於斯長於斯其歿也葬於斯千載而下尙能興雲致雨福惠鄉里且賢哲之於四方固無越肥秦瘠之間揆之以聖人去齊則接浙而行去魯則曰遲遲吾行也則知公神游故國裴回而不忍訣者昭昭矣矧今之吠疇乃昔人之耕稼今之遺民乃昔人之子孫苗裔惟桑與梓必恭敬止宜乎邦之人尸而祝之社而稷之也公之出處語默范蔚宗東漢書眾神僊傳具載其事然而能治廬山之鬼於呼吸之間而不能已憲陵侵毀小人墳墓禁錮廿餘年能滅成都之火於數千里之外而不能理竇武陳蕃之冤於咫尺之間竟自懼其禍嗚呼公之所能者德勝妖也公之所不能者天也不然廷尉之獄何其逼耶當桓靈之際闢豎擅政於中儉人用事於外舉朝之人不附於此則陷於彼士大夫中立不倚者幾何人斯其憂國愛君殺身以成仁有如公者蓋歷歷可數也傳之故老墓

上舊有公廟邑人事之惟謹飲食必祭水旱癘疫必禱禱之輒捷如影響廟因河水泛溢金皇統間遂移於此見於大定廿五年鄉貢進士山邦直重修廟記歲月滋久棟宇是傾象設僅存風雨弗庇里人耆老相與合謀而營葺之富者以財壯者以力剗剝朽壤之工亦各獻其技昭其儉也願舊貫之雖仍撤而新之與改作而何異落成於大德三年之春廟當有記謹其始末祝集賢慥以鄉人之意屢以爲言故援翰而不辭焉曰暘曰暘曰雨曰雨年屢豐穰物無疵厲則神之庇蔭一方者亦可以爲至矣而神之望於人者豈特性醪香火具而已哉力田則有秋惰游則鋤口不給其於仰事俯畜之際可不慎歟肝鬻之間動靜交養則神之所以爲神人之所以事於神者庸有既乎又明年春三月望日記

大德五年十一月十九日建

安陽李郁刊

康少山按後漢書巴內黃人學覽經典爲桂陽太守定禮制興學校李固荐巴治迹徵守光祿與杜喬周舉等八人行郡邑巴素有道術能役鬼神豫章郡多山川鬼怪巴翦理姦巫百姓以安會憲陵壞人塚墓巴上疏切諫坐下獄抵罪還家二十年靈帝卽位陳蕃竇武被誅巴訟其寃帝怒付廷尉自殺章懷注引神仙傳巴治廬山廟黃父鬼及正朝大夫會嘏酒止巴郡火皆荒誕不足信也巴非邑人故不志於人物而附見於此



劉廣字熙載洛水人有文名當時大製作皆出其手元史有傳

案碑前題銜翰林直學士朝列大夫知制誥同修國史劉廣撰并書承務郎太常寺丞李元禮篆額元史本傳廣大德二年陞翰林直學士六年奉使宣撫陝西由侍講學士陞學士此碑立於大德五年書官與史符惟朝列大夫同知制誥傳亦略之不書碑載樂尚書魏郡內黃人也縣嘗隸相州後還魏郡公墓在安陽之伏恩里攷內黃還魏郡宋時割隸元因之故碑云然又言傳之故老墓上舊有公廟廟因河水泛溢金皇統間遂移於此見大定廿五年鄉貢進士山邦直重修廟記內黃縣志漢樂巴廟舊在冢西金大定二十五年重修進士山邦直記後爲雷擊正與碑符

韓氏新塋世德之碑

存正書大德七載九月立在縣東南伏恩村

太中大夫江南浙西道提刑按察使胡祗遜撰

奉直大夫前彰德路轉運副使李揆篆額

承事郎太常博士男胡持書

韓之賜性命氏有國有家見於詩於春秋於司馬史記子孫或晦或顯代不乏人遭秦并

田既廢封建亦判罷賢望之後同列編民離鄉去國譜世系族墳廬夏法偕亡散處四方流落異域故莫考其世次宣武將軍中衛千戶韓進狀其考妣之德業請銘墓碑韓氏世爲大康方城人完顏金亡避亂求安北渡河遂占籍相之安陽伏恩宣武之考諱成妣朱氏朱亡娶其妹生男七人曰興進舉冲惠忠璋今所存者進忠兩人耳進卽宣武公也孫男七人德榮德祿鵬飛德溫德恭德元女孫十人成隱德不耀孝悌力田終其身進結髮從軍隸本路元帥李侯帳下以材勇爲百夫長攻釣漁下襄鄧破坦賊屢以戰功受錦衣寶鞍之賜仍得拔都之美名至元四年隸屬武衛出則先驅清道春水秋山入則守護門關修完城郭首尾服勞者七年至元十一年九月樞府劄口管鎮襄樊歸附新軍是月拜命同右丞洪公取日本奪敵旗馬鉦鼓以功北京行省咨保於樞府樞府授以北京等路新簽洪軍二百一十名千口告身一通月俸十七貫文十五年正月勅牒拜忠顯校尉管軍總把月俸有加十六年陞武略將軍明年八年宣命武義將軍月俸有加又明年陞武德將軍佩金符復征日本不妨本職充行省都鎮撫兼提舉帳前總戒旗鼓司事大德三年十月欽授恩命遷宣武將軍職事如故公孝思追遠自謂以騎射起舉得至今日皆父母怙恃誨道之恩欲報罔極七年秋卜葬考妣於清河之西域阡陌不可無旌紀銘曰

集德在身弗仕弗耀天道昭昭以福酬報其報維何有子克孝其孝維何宣武是蹈扈從勤勞雪衣霜帽衛侍謹恪雨牙風蠹公不及私貞不改操彤弓金符功賞加懋起宗榮親人莫能到生事愛敬沒葬豐茂來裔如林是則是效

大德七載秋九月七日宣武將軍中衛千戶進忠等立石

案碑前結銜太中大夫江南浙西道提刑按察使胡祜撰奉直大夫前彰德路轉運副使李揆篆額承事郎太常博士男胡持書元史列傳祜字紹開磁州武安人召拜翰林學士不起改江南浙西道提刑按察使與碑合子持太常博士亦與碑符惟祜階太中大夫子持階承務郎傳略之不書碑約述成隱德不耀孝悌力田終其身而載其子進歷官戰功獨詳蓋進初以材勇爲百夫長拜忠顯校尉管軍總把陞武略將軍宣命武義將軍陞武德將軍充行省都鎮撫兼提舉帳前總戎旗鼓司事遷宣武將軍云元史不爲立傳故據其事書之碑云至元十一年九月樞府劄口管鎮襄樊歸附新軍是月拜命同右丞洪公取日本奪敵旗馬鉦鼓以功北京行省咨保於樞府授以北京等路新簽洪軍二百二十名攷右丞洪公爲福源第二子俊哥小字茶邱元史有傳至元十一年八月授東征右副都元帥與都元帥忽敦等領舟師二萬渡海征日本拔

對馬一岐宜蠻等島碑所指卽其事但碑言九月與傳作八月異外國傳十一年期以七月征日本冬十月入其國敗之而官軍不整又矢盡惟虜掠四境而歸是又以七月始出征十月卽罷師矣宜以碑爲正若進屢以戰功得拔都之美名据輟耕錄漢人賜名拔都者惟文忠武王與太師張獻武洪範及真定新軍張萬戶興祖据此則進亦漢人賜名拔都陶氏蓋檢不及此矣祇適本傳至元三十年卒此碑猶述大德三年十月欽授恩命蓋僞托以爲重非祇適撰也又碑前云破坦賊坦卽李壇蓋借用之

韓氏世德碑陰

存正書

祖母朱氏

高祖 曾祖 祖父韓成

祖母朱氏

劉氏 妹連哥

胡氏一子身故姐姐喜哥婿王郎

陳氏一子來住姐姐雪哥

次子丑 次妻孫氏女嬌鵝

盧氏一子栢壽魏氏一子蠻子女貴哥

韓進王氏長子鵬飛金氏一女丑哥

王氏次子德讓金氏一女□□

金氏二子德元陳氏一子張□

次子松壽

張氏一子馬住

三姐賽兒婿張郎

二姐丑兒婿高郎

大姐巧兒婿王郎

韓興鄭氏一子□祿王氏故

次子六兒

次妻胡氏三子一女長子□□

次子都林

女 奴兒

王氏妹宜哥婿李□

韓□段氏一子德溫一子一女□兒女□

韓舉陶氏一子德榮王氏二女二奴馬頭

妹連兒婿王郎

韓璋 身故

王氏一子□兒女針姑

聶氏

長子□兒

韓忠張氏三子德恭司氏三子次子獮兒

次子身故

次子丑妮子

次子身故妹陳奴婿王郎

韓冲 身故

案碑陰載韓氏凡五世高曾皆闕名書子女并及其婿蓋牽連之文非譜例所宜也自系牒不明浸傳數世子孫皆莫攷其先使知以鐫之墓碑之後猶愈於闕然不講則韓氏碑陰可法已

漁莊記

存行書大德十年閏正月舊藏監生孫納家今移置縣學

漁莊吾雲卿撫管韓侯之別墅也去太行東麓三舍洹水界其下號萬金渠折北而東抵相十里而近切東陔百許武卽其地也其西北諸峯絕巘橫亘天表如萬馬注波而天下視岡巒聯絡一起一伏若拱若侍林樾邃蔚一重一掩若擁若衛朝曦夕霏陰晴晦明百態呈露顧搢不暇望銅雀之廢臺則知魏武徙都之謀覩韓陵之戰場則見高歡必爭之地懷魏文貞則故笏不復見思韓忠獻則畫錦非所誇凡接於耳目者皆會於心不越衽席可上而盡也相之勝於是爲最比侯走書京師謂儼曰我汲縣府君買田洹上爲菟裘計願未之遂齋志以歿從益無似繫官於朝乃弗克構仰惟治命曰夕往來於心未始少置今茲幸若弛擔歸守桑梓始獲作我攸宇周垣於外築之登登架屋其中植之亭亭面山有軒瞰溪有亭白雲在簷激波在楹佳花珍木錯紅峙青種秫而釀不乏釣鮮而食足供客至則遐矚俯眺神曠意怡觴詠麋酬挽不聽去間與漁蓬樵藁杖履相尋魚鳥欣然□適其樂因題曰漁莊夫勝不自勝因人而著實先人卜之也迨今三十餘年始克卒成先志不孝孰甚焉先人生雖不獲遂其初心而神靈昭昭其必邀遊於此亦少慰於九原

矣子其爲我識厥事儼曰世之不仕者謂仕爲妄爲躁爲貪名爲徇利爲觸禍機爲履危地不若不仕之情也仕者謂不仕爲隘爲□爲欺世盜名爲索隱行怪爲少室索價爲終南捷徑不若仕之任也儼謂彼此相詆皆非也蓋出處去就士君子之大節當出而出萬鍾非秦也當處而處一瓢非憊也可去則去浩然歸也可就則就幡然改也顧無可無不可要亦有時中之義存焉耳彼錮林泉者能德而不能返楛軒裳者知進而不知退尙奚足語此哉予雅知侯殆十五六年揚歷臺省爵爲時棟不媿嬰不突梯譽譽誇誇一節不回於以見其立朝之剛豈不仕耶及西曹投簪而歸前年除廣平牧去年改樞府判俄又拜奉常卿一不就方退藏於密願爲烟波主人若將終身焉於以見其勇退之決豈仕者耶非卓然有定見動而時中者能至是耶視嚮之規規執一之說穹壤矣儼特以侯善繼其志爲達孝乃作記以告夫未知者仍系以詞使漁郎鼓枻而歌詞曰

太行西峙兮洹之上洹東綠兮屋之下有美人兮相羊脫纓塵兮解組木石兮吾隣鷗鳧兮吾伍抱明月兮擁青霓奉朝嵐兮捫夕霧願舉音兮何許杜若洲兮蘭渚眇寥廓之冥鴻兮彼羅者其奚慕悲世網之挂士兮綴者輒取夢中流兮風涌幸出險兮猶怖恙逍遙與世絕兮矧信美又吾皇昇予以終焉兮曰惟我府君之卜墅繫□草木其勿翦兮尙無



望先德封殖之所

大德十禩蒼龍丙午閏正月申澣北山陳儼記吳興趙孟頫書 安陽學郁橫刻

中州金石記漁莊記大德十年閏正月立陳儼撰趙孟頫行書在安陽碑云吾雲卿總管韓侯之別墅也去太行東麓三舍洹水界其下號萬金渠折北而東抵相十里而近切東埃百許步卽其地也云云洹水今名安陽河萬金渠在安陽西北二十里洹出寶山經府城西分注東南溉田世傳魏武所開又云其利可抵萬金故以名也予按鄴故多水利自西門豹始隋唐宋元明因之其在安陽內黃湯陰臨漳武安林縣涉縣者至今往往而有守土官其如何疏濬裨益於民則考古之學通於政事矣

授堂金石文字續跋漁莊記石出土陳儼撰其文序雲卿自述我汲縣府君買田洹上爲菟裘計願未之遂齋志以沒從益無似繫官於朝乃弗克搆今茲幸若弛擔歸守桑梓始獲作我攸宇迨今三十餘年始克卒成先志從益字雲卿元史不爲立傳仁宗紀至大四年召世祖朝諳知政務素有聲望老臣給傳詣闕同儀庶務內有參政韓從益卽其人也亦見英宗紀至治三年授前樞密院副使吳元珪王約集賢大學士翰林侍講學士韓從益昭文館大學士並商議中書省事然則從益以老成之重爲兩朝所毗

倚彼其先固由恬退以植其素故也記又稱從益西曹投簪而後除廣平牧改樞府判  
俄又拜奉常卿並可舉以備史遺文

康少山按記雲卿不就奉常爲煙波主人將終身矣而元史郝天挺傳云仁宗登極雲  
卿與郝天挺蕭料馳傳赴闕同議庶政仕至昭文館大學士封魏國公何翻然之易也  
豈人世之福易得而雲山供養造物不輕以予人哉雲卿名從益陳儼不知何許人蘇  
天爵元文類取其文數首亦當時知名者兩人元史皆無傳

### 重修興陽院碑

存正書至大元年五月立在縣西南俗名丈八佛寺

將仕郎國子助教王或撰并書

承事郎同知潭州路湘陰州事李棫篆

今天下都會州郡縣邑山水奇勝富麗之地盡窮其選以爲大小梵宮可謂盛矣大者因  
國力小者資檀越復有釋氏能宏其道所以大而能成其大小而能成其小惟相之安陽  
交口村興陽院無國力檀越之助以小而能成其大者由佛之力也寺之肇基未省何代  
臆其初必有浮圖氏之才者有云茲陽崦西南土腴而石潤草樹斐疊光彩照映有石像

之至人由地中出望而畏之慄慄而懼仰而瞻之頎頎而長其靈異也遽聞遠邇慕嚮者奔走駭汗輻湊而竟赴之皆欲徙置塋塋屋而居之扶持將行確乎不移屹若山立迺趨陽崦雖道有齟齬反不勞人然念慕爾一區非巍然之閣不能容其身無曠今之地曷能宏其閣遂叛塔之覆之其傍必有室堂齋廚門戶之具度財役工不可勝計豈不曰以小而能成其大由佛力焉厥後不知幾經劫火蓋可嘆也佛灑之入中國至梁而後大至唐而後固千百季間纔廢而旋興稍微而益熾變瓦礫爲寶坊化草萊爲金碧茲寺之廢由金季喪亂之餘惟塔存焉曠日持久而不能復蓋嘗有僧來主者睹無陋坳圯之至無誠懇堅苦之心人不爲之感動輒自引退逮至元癸酉里中耆舊呂義黃進等稔聞順德大開元寺誘進二師者皆純一端懇持律嚴信道篤願請主之幸惠然肯來二師曰吾素聞古有聖迹其福地可居義等忻然以附寺荒田長林灌木並施以爲修廢之資二師乃樂爲勞苦不憚寒暑荷鍤負□薙穢斲枿掇拾瓦礫手足胼胝如是者有年學徒稍集方議經度復以寺基迫隘爲嫌相彼塔陰乃陟其礪土石相戴迺率其徒鑿而鑿之又增廣焉遂擴灑堂序廊廡起龍祠土地廟貌築僧室爲庫廡爲齋廚爲門戶不數季而復還舊觀加封貴焉耆舊輩與二師眾相謂曰觀道場之形勝背倚寶峯左瞰清洄通遠前帶右礪

太行中有重崗復嶺以環抱焉樹林翳蒼煙雲濃翕張覆露疏豁扉做朝曛獻景鏡因人勝可無礪石以紀焉演也知孝親滿公上人雅與或遊暨昶踵門偕來謁文余諾而爲之且繫之以銘曰

興陽地僻具勝緣古有聖跡誰其傳像肖永寧丈八傳至今聞人指湧泉未知肇造夫何年浮圖霄崢猶依然幾經劫火陵谷遷棟宇悉作灰飛煙誘進來嗣忍且堅果也服勞爭相先剗削嶮隘宏祗園棟題雄構相蟬聯輪焉奐焉美且鮮淑景遐邇旅百千演也承事復益虔請以盛事青瑤鐫其後來者宜勉旃

功德主承事郎真定路彙城尹邢德裕

至大之元歲舍戊申五月聖住持僧黃洪演立石

張楷安陽郭儀刊

案碑前列將仕郎國子助教王或撰并書承事郎同知潭州路湘陰州事李棫篆元史地理志至元十四年立行省改潭州路總管府所屬州有湘陰此題與史符其序寺由金季喪亂惟塔存焉逮至元癸酉里中耆舊呂義等延誘進二師主寺興復遂成勝概癸酉歲至元之十年也

重修興陽院碑陰

存正書

祖師弘慈博化大師廣恩

宣授彰德衛輝懷孟等路一宗僧錄圓明大師通吉祥勸緣淨土院定慧大師權彰德衛輝懷孟等路一宗僧錄司事燦吉祥宣尙座

宣授儲禪宮本宗提拏顯真弘教葆和大師陳道明助緣

直歲崇闕妙管妙論妙德院主普進都講洪演洪杲洪雋洪禧洪淵勝全勝因

首座崇詵講主妙通妙懲妙安提點普誘權講洪果勝慧勝智母親普圓勝順

本村立請狀耆老人名下項呂義黃進呂卞呂叙張仙呂九郎張溫司聚司顯郭太

林彰縣元橋呂彬錄事司木匠付成天禧鎮劉泉錄事司彰化院順院主水冶孝親院租

都講滿講主喜院主

湯陰縣鶴山鎮劉提領東善應王福妻高氏西城村高源妻黃氏水冶賈秀寶申良或

錄事司魏大夫

潞州壺關縣龍真村徐全同妻王氏東安善段准晉庄村元祐廣

助緣花名下項張溫司顯呂□男呂瓊妻趙氏黃用張信張誠呂□呂讓呂謙呂進呂瓌  
呂積呂諒郭祥馬玉張進韓平郭秀才靳德彭福聚鞏大呂宅韓氏西呂三

南交口村齊塢張百戶曾福張□馮成邵大謝成吉德善王平吉五吳大齊三

南齊村呂熙張源李宣張瑞賈振趙英曹寬曹政王榮趙義趙信趙瓊魏彬王珪王忠進  
王聚劉通李德張義張青張顏劉海曹順王宅韓氏

東馬店趙大西流寺木匠趙博士安陽石匠

案碑陰載林彰縣林與臨古通用字最後稱西流寺木匠趙博士據授堂金石文字續  
跋唐同光禪師塔銘有造塔博士宋玉名因引黃省曾吳風錄謂張士誠走卒廝養皆  
授官爵至今呼椎油作麵傭夫皆爲博士剝工爲待詔陸容菽園雜記醫人稱郎中鑄  
工稱待詔磨工稱博士師巫稱太保茶酒稱院使二書所記皆謂在明初蓋亦未悉其  
沿於何時今以此銘稱造塔博士則當唐世呼工作人有是名矣後唐鈞大德塔銘博  
士侯建鐫字造塔博士郝溫宋通利軍鍾題識後有匠人母郭氏小博士□元小博士  
王在俱在明代之前據是則陸黃二君未能推稽至此予更以此碑陰稱趙博士當至  
大元年亦前於明代又爲續跋資一証也

興陽院施狀銘

存正書至大二年正月立在今俗名丈八佛寺

彰德路安陽縣交口村住人呂義等今爲本村古刹興陽院見今房屋摧倒殿宇損壞無人修理議定請到順德大開元寺僧普誘普進住持興工修造永遠爲主一任剃度其院並無常住所有荒地不計畝數東至朱家嶺南至偏涼西至吉大又西至呂叙北至寺後東西嶺中心爲界四至內土木相連盡係捨施充爲常住修造本寺房廊用度端爲祝延皇帝聖壽無疆佛日增暉法輪常轉各家檀越人口平安者今將施狀故書於石以記其源耳

至元癸酉五月日立施狀人呂義黃進呂下呂叙張仙呂泰呂興張溫司顯郭大南呂大至大二年正月日洪演立石

案施狀銘稱古刹興陽院是寺之建置已久元時土人蓋莫攷所起今但從俗呼爲丈八佛寺浸失其實矣元史地理志至元六年併輔岩入安陽此地各交口村卽輔巖地入安陽書之以備疆域所存

安陽縣金石錄卷九終



安陽縣金石錄卷十

偃師武虛谷先生著

安陽縣知縣鐵嶺貴 秦校梓

皇元東昌路總管府推官杜君墓碑

存正書在縣西北王裕邨延祐元年二月立

集□待制奉訓大夫監察御史祝慥撰

中奉大夫山東東西道肅政廉訪使韓從益書并題額

緱山先生以文學名海內與王鹿菴□□□單公翰林每遇則必貫穿經史論難古今是非得失尤以爲知己惟不得志於時憂喜哀樂一發於詩止以詩傳於世既歿葬安陽君其第三子也諱□□□字榮季以家學見聞之素至元間中丞□溪王公時任河北監司薦之御史臺爲□□□川道按察司書史留□歲轉山東東西道考滿除濟□路□歷時歲終諸路□官偕計□赴京師考其財穀出納之數往返煩廢皆歛於民君建言會計有名無實徒耗輿馬物力之用因是從其請□罷之規□改□之餘以□□□人墳墓所在□兒爲四方之望今褊陋不稱官府宜大而新之監郡者同其議經始數□規模宏敞匠塢

精密遂爲□□□之冠任睢州判官□以學宮乏廩祿給田二十畝以爲供贍立學校聚邑士擇師而教之以化其俗後乃始理官之廢務吏之滯事條目以行睢之城近於河是年水漲溢幾與城平官僚暴露城上伺察水候吏來□曰城已有圯市民皆具舟楫以逃盍亦還第顧其族屬君叱吏曰保城禦災吾職也□□□平不去水亦不爲□受大名路經歷魏乃河朔重鎮屬邑賦役□□供辦□□君職特其中爲上下倚注先已以率眾勤身以治人故內外官賢無廢格事郡官糴米二萬石欲爲民用君以錢米出納之際吏爲□蠹官費甚而民得無幾不若以錢直下於民則弊去矣上其議於戶曹□□焉耆儒劉清叔年八十嘗客於緱山一子歿二孫無力以營葬具君□□作墓葬其父子及尹河間之吳橋先正板籍差等戶口強弱輕重一□於是前時不任負重逋逃者聞之皆曰吾等□徭平矣多復故業而樂爲輸焉邑民郭以地質錢於邢徙家他所數十年而後歸其地直增百倍郭賣錢以贖邢輒冒昧曰吾已買之何以贖爲訟於□久不得直憲司以君公廉委治其案乃以知術得其情迹始驗邑里萬眾稱快歲十月宗室例以駝□下於□路□當分廩飼養廩之材瓦力役□所率斂皆出吏手一取其半多歸單弱下戶至是君以邑中豪富家昔之官府所不敢加徭役者□爲修築□□趣辦貧者不知其難皆

歡聲悅服縣多大姓地連阡陌貧寡者死無所歸君爲買地使葬其中名曰義塋原自是死者尙澤及肉骨况生者乎民爲刻石以紀其德歲滿還家事兄尤愛敬雖杯酒菓蔬幡然相對歡如也晚年意不欲仕銓曹以例未當致仕除東昌路總管府推官到任未幾以疾終享年六十有八疾革有孫侍側教戒曰吾家自高曾業儒汝貧可忍讀書種子勿絕也一子曰愚自東昌以舟載其柩歸相皇慶二年十月十四日葬於先塋之兆曾祖以上世爲霸州信安人隱德不仕祖進之及○緜山先生從金徙居河南讀書緜氏山中肄進士業○卒於芝田考入皇朝應粘○中書分聘自洛遷相遂爲相人邱壘旣卜君念祖之遺柩未安負以歸葬緜山墓域初娶陳氏事舅姑孝從君宦於外惟以勤儉自將卒於濟南今合葬焉生二子曰愚爲大名教諭曰齊奴早卒再娶仙氏能諧內外族屬男孫三人曰秉彝秉鈞秉直女孫一人在室愚縗衣煢然來謁○愚○故○有日○父銘以○於壙惟是平生一二之行無以○見墓隧詔後之子孫敢再拜以請自吾從緜山學始識榮季嘗憶在學舍君賦香篆云石爐秋月蝸涎冷金屋春○蠹字閑坐皆○其能作詩○類尤喜長短歌行及長年臨事強志力行遇紛冗有撥煩之能自號曰肅齋嗚呼歷○郡邑之行何其能且多也使君○二千石復何難哉惜乎所遇者止於此而已

遺之以銘以慰君之有知銘曰

生有以嗣其世是爲緱山之季子歿有以歸其縣尤盡窳窳之備禮况乎政治見稱於民材能有爲於事官雖不達於一時表此尙可百千之禩

延祐元年歲次甲寅二月乙卯朔廿九日癸未建

案碑少損餘前題集□待制奉訓大夫監察御史祝懔撰中奉大夫山東東西道肅政廉訪使韓從益書并題額從益元史無傳見仁宗紀至大四年召有聲望老臣內參政韓從益卽其人碑載杜君諱□□証以魏公神道碑三子處愿終東平路推官有惠政是可參驗矣處愿歷官始除濟□路經歷任睢州判官授大名路經歷尹河間之吳橋除東昌路總管府推官未幾卒又載祖進之及□緱山先生從金徙居河南讀書緱氏山中肄進士業□卒於芝田進之卽時昇金史有傳史書其於正大末卒未著爲何地据碑乃知其在芝田而處愿間關遠涉負遺柩以歸葬於此亦爲賢矣

元聖旨碑

存正書延祐元年七月立在善應村菜園內

長生天氣力裏大福廕護助裏皇帝聖旨軍官每根底軍人每根底管城子達魯花赤官

人每根底往來行的使臣每根底宣諭的聖旨成吉思皇帝月古台皇帝薛禪皇帝完者都皇帝曲律皇帝聖旨裏和尚也理可溫先生每不揀甚麼差發休著者告天祝壽者麼道有來如今呵依著在先聖旨體例裏不揀甚麼差發休當者告天祝壽者彰德路有的善應儲祥宮裏住持的提點祿和顯真宏教大師陳道明彰德路應有的宮觀提調著行者麼道聖旨與了也這的每宮觀裏他每的房舍裏使臣休安下者鋪馬祇應休與者稅休與者但屬宮觀的水土園林碾磨店舍鋪席解典庫浴室不揀甚麼他每的不揀誰休倚氣力者更這陳道明倚著有聖旨麼道無體例勾當休做者做阿他不怕那甚麼聖旨虎兒年七月二十八日察罕倉有時分寫來

案碑稱元帝凡五代自成吉思皇帝至曲律皇帝而止曲律謂武宗也是碑蓋建於仁宗延祐元年爲甲寅故云虎兒年又碑上層西番字下層正書西番字卽帝師八思巴所制月古台皇帝謂太宗也元史作窩濶台譯音相近卽借用之是碑見存善應村菜園而旨內稱善應儲祥宮今碑西三十餘步尙有故基并大鐵圈安置石上當卽儲祥宮舊物束旗桿用者土人不知所從來因附見之嘆遺跡之存歟矣

大都大慶壽寺住持大司空北溪長老施錢米記

存正書在城內天寧寺

惠予可嘉世之所共尚者况清淨布施回向福田其於義也甚宜爰有大慶壽寺住持大司空北溪和尚禪門綱領僧中範模榮膺寵渥主大慶壽者有年且□彰德路天寧禪寺爲受業地一旦以中統鈔壹伯定白米貳伯碩奉入常住出息爲山門費俾每歲八月初四日設供飯僧用資恩有故揭斯石以垂不朽云

至治元年八月初三日

監寺僧智理提點僧智恕立石

案前題大都大慶壽寺住持大司空北溪長老据元史釋老傳瑣南藏卜弟子之號司空司徒佩金玉印章者前後相望此元代崇尙釋教蓋於西僧多假借以官號如此至閩復撰重修釋源大白馬寺賜田功德碑云行育卒詔贈司空鴻臚寺卿則內地僧眾並冒爵名記北溪長老殆相同矣

零泉寺鐘識

案鐘識正書陰文在寺東廊文云大元國彰德路臨漳縣張呂村靜居寺比丘僧崇定今發願心出已錢匠人鑄造鐘一顆重二百斤於本寺常住用度乞保父妻百戶母張

氏并及婁宅大小貴眷吉祥如意更爲三界萬靈俱沾利樂九有四生同登覺岸靜居  
寺住持澄鑑大師案鼎監寺僧洪添崇義崇榮助緣監辦功德主本村社長馮世良鑄  
鐘匠人赫善輔至治二年十一月謹造据鄴乘所載宋志臨漳永寧管統村有張呂卽  
此識張呂村自宋迄元猶未改易矣

彰德路天寧寺鐘識

存正書在天寧寺大定元年正月

榮祿大夫大司空領臨濟一宗事主大慶壽寺住持彰德路十方萬壽大天寧禪寺佛心  
普慧大禪師北溪提點智恕首座智義智□智空監寺智理維那智才賓門智達副寺智  
澤副寺智從典座洪琪直□智煥知客洪舉錢帛德林□事洪嚴化緣僧洪望助緣銅山  
鎮普濟院提點善粲施錢功德主銅山鎮孫受益王君祥王□卿程□□韓文申朱從義  
王敬先張士舉焦天瑞焦仲賢張民憲胡仲實焦教授牛信甫賈文甫王伯福王伯謙王  
仲和李義承都功德主保義校尉安陽縣達魯花赤怯林公艾山鎮張宣使韓用中銅山  
鎮王紀元楊和甫宋寬甫男善人張士□女善劉氏女善人何氏女善人劉氏女善人□  
鐵鐘大鑿劉文□大鑿□忠門人杜□劉元第□鑿工人王延太定元年正月

案鐘識榮祿大夫司空領臨濟一宗事主大慶壽寺主持彰德路十方萬壽大天寧禪寺佛心普惠大禪師北溪提點智愨元史釋老傳威言帝師之威其弟子之號司空司徒國公佩金玉印章者前後相望此稱領臨濟一宗殆於禪師亦擅此號爵權益猥濫矣後載保義校尉安陽縣達魯花赤怯林公艾山鎮銅山鎮皆足補前縣志所遺又稱鑄鐵鐘太鑿及鑿工人并以鑿作監泰定作太定通用字也

白龍潭廟碑

佚致和元年六月舊在潘流村

王博文撰書

距城西南二十里潘流村有白龍潭者叢祠蔚然其水不經見其詳不得而攷焉蓋山泉細溜泓渟洄洑匯而爲潭者也故老相傳中有神物居之頃年旱暵有禱輒應泰定丙寅燕人馬合謨來守是邦德化昭昭民物熙熙越明年丁卯秋旱禱而果雨遂割俸金一新廟貌所以答神貺也又明年戊辰實致和改元正月不雨至六月蹇陽肆凶麥無完穗懼旱之禾日就焦稿太守有憂之躬率僚屬絕羶葷去巾襪行香致懇徧告諸祠越五日僉判侯公思明乃諭於眾曰彼潘流龍祠者曩因旱請不旋踵而雨應今茲旱虐滋甚公等



何待而不往禱焉且歲事不登饑饉游至司民牧者爲之奈何祈禳救荒固下策也雖然書不云乎至誠感神第恐吾人不能盡其誠耳吾其往焉幕僚知事王德暉照磨汲宗黯實佐其行協共乃事擇日涓潔徒步而詣所謂白龍潭者卽事之始先以絳帕覆二瓶置香案謂之請聖水得請則水滿其瓶不得請則瓶空如故亦可以卜雨之有無於是祝奠如儀肅拜無算水幾瓶中水滿而絳帕不濡斯爲靈也已旣而舉水以歸崇奉惟謹居二日陰雲四合而雨乃大作槁苗浹興人心救寧歲號小稔嗚呼龍固靈物也不有僉判等之精誠無以見其神異僉判等固循吏也不有太守閔農憂無以盡其虔禱之勞太守固賢二千石不有視民如傷之心無以回天地之和氣嗚呼盛矣哉

案碑佚今據鄴乘刪節本補入撰文及書者出王博文一手博文見元史李冶傳云儒生有如魏璠王鶚李獻卿蘭元庭趙復郝經王博文輩皆有用之才又皆賢王所當聘問者舉而用之何所不可是博文爲時所重如此而鄴乘惟載博文魯人徙居相之清和坊號西溪從元憲宗南征歷官禮部尙書御史中丞卒封魯國公謚文定其被薦舉之美尙未悉也今覩其文導揚諸有司閔農祈雨亦不溢美則其言之不苟又可懷也安陽諸小村多祀白龍虔奉爲最篤然問其由或莫知之予檢鐵園山叢談所載相州

古鄴郡其西有隆慮名山也寺則齊禪師道場亦名利也寺大門之前左右二池東爲黃龍西爲白龍所窟宅政和間適大旱安陽人禱於池既大澍於是一時爲之飛奏詔加封爵焉及褒命下世俗不知厥繇但迎置諸東池而已一旦雲霧四合如墨天大雷電異常有頃眾登寺樓望則了然見白龍與黃龍拏戰而黃龍敗焉白龍乃奮迅下取山嶺將塞東池垂半矣黃龍既獲其居故屢鬪而屢敗且不已其右山谷間白龍之所據則水屯於門之外波浪高踰寺樓也羣髻大懼爲焚香諷咒於樓之上始悟向之大雨實白龍爲之而黃龍冒其賞故一至此競於是寺髻力爲之講解仍許再告請上別作諸終日始得平白龍因收水而退矣詔復封白龍焉蓋此地相傳以白龍致雨自宋已然故略見於此

案記稱潘流村有白龍潭者叢祠蔚然其水不流云叢祠見漢書陳勝傳間令廣之次所旁叢祠中張晏曰叢鬼所憑也師古曰張說非也此言密於廣所次舍處旁叢祠中爲之非戍人所止也叢謂草木岑蔚者也祠神祠也今碑所謂與顏氏合据戰國策應侯謂昭王曰亦聞恒思有神叢與恒思有悍少年請與叢博曰吾勝叢叢藉我神三日不勝叢叢困我乃左手爲叢投右手自爲投勝叢叢藉其神三日叢往求之遂弗歸五

日而叢枯七日而叢亡此張說所據卽今俗巫跳神傳語故陳勝使假爲狐鳴也叢祠其神之區也張說可依則此記所云未審也

案郭文簡續府志採此文入藝文於記末題承事郎睢陽尹郡人王博文撰此必碑舊題也蓋文簡時碑猶未埋毀故得據以書實

彰德路儒學叛置雅樂重修講堂

存正書天歷二年七月立在今府學

欽惟我元以神武定天下以文德綏四海禮樂造多士故萬方郡邑皆設學校選賢徒以誨之擇明師以教之蓋學校興化之□育材之地得人則興失人則廢自古然也自賢者觀之則以爲聖治之惠政不肖者視之則亦以爲悞時之末務自□□□威衰俱係乎賢之得喪□□之自出亦係乎學之廢興也堯舜三代賢材萃出國都閭巷莫不有學故其世□神基開於無窮矣秦滅德教焚毀詩書□戰而來角逐羣雄不數十載而七廟□毀子孫無遺以此觀之則學校之設實非細故豈坐視圯毀而不留心也耶彰德路儒學自國初尋建已來經今百有餘年其間廢而復興興而復廢者多矣莫不賴賢守者以經□之班班其名著乎人耳目不過數人焉亦何賢之艱哉於秦定閭本路總管馬公□同知

伯顏公判官侯公等下車之初每垂意於郡學暨升降釋奠觀樂工執俗樂歌哇淫之聲公乃歎曰樂之所以感人心變民俗人之邪正由之其可以是導之乎於是召吏欽遵大典勸率諸儒多輸私財爲僚屬倡眾欣和之遂□中統鈔百定餘選錢□錄蕭從□□江浙不遠千里僦工□成古樂器陸拾肆件一遵古制樂既稍備又慮講堂齋舍等欲將頽圯師生無所容恐終歿美績又及乃僚僉謨掇割俸貲□屬縣估輸□財急儕工匠一物必酬其直□介無侵於民□舊益新甃瓦重完壁飾□美粲然一新經營於天歷二年之四月落成於當年之六月乃請同僚□□堂本爲國家育養人材而設今既完矣生徒若是寥寥反不若一縣□之多□吾□勸□有不至者歟吾聞之善爲化者以善誘民而利導之□□□□□□凡諸生隸學者悉捐雜徭勿令與凡民等才德之優者成秩序擢貢之既而生徒雲集增廣元額衣冠濟濟絃頌洋洋非他年比於是教□□忠及□□□曰□□來撫是類者如前數公誠知務矣今之治郡者其爲國忠貞之心務崇學校勵賢興化功不在前數公之下矣可不勒石以勸來者乎因召諸生□□□□之曰是學也有儲書以會其淵源抑有以資其博識有琴瑟鐘鼓以正其八音抑有以蕩其邪心而今而後其可以出入無□□□日徒弄筆於華巧□□□□□以研精乎其爲師者亦可以

博奕飲酒優游以日□厥職乎抑後之爲治者亦可以不務德禮導民徒以簿書期會錢穀出入爲政之本乎諸生宜勉勉勿替□□向學不惟獨稱於郡守者之用心抑亦斯堂則不爲徒建也時天歷貳年孟秋下□□□日學正平璉記并書

宣武將軍彰德路總管府達魯花赤□□路諸軍奧魯總管府達魯花赤管內勸農事  
□兒

太中大夫彰德路總管府本路諸軍奧魯總管內勸農事馬合謀

奉政大夫同知彰德路總管府□□頁

承直郎彰德路總管府判官侯□□

承務郎彰德路總管府推官徐□□

承事郎彰德路總管府經□□王起□□

從仕郎彰德路總管府知事王德輝

將仕郎彰德路總管府提控案牘兼照磨汲宗黯

儒學教授繆忠學正平璉 學錄賈頴立石

安陽張楷刊

案碑後列學政平璉記并書其文云泰定間本路總管馬公同知伯顏公判官侯公垂意於郡學暨釋奠觀樂工執俗樂歌哇淫之聲於是召吏欽遵大典勸率諸儒多輸私財僦工成古樂器六十四件云云元史閻復傳元貞元年上疏言京師宜首建聖廟學定雅樂從之此雅樂起於京師復爲之唱也暨後諸路亦設雅樂見於禮樂志延祐五年命各路府宣聖廟置雅樂選擇習古樂師教肄生徒以供春秋祭祀是也宜其時諸府路皆爲之奉行然据此記在天歷二年廟學猶有執俗樂之誚有司因循致格詔令不行可爲太息已此記所云欽遵大典當卽指延祐命置雅樂之文平璉記其事耳彰德路儒學叛置雅樂重修講堂記碑陰

存正書

缺 儒學監修官吏人等

安陽縣官

承德郎安陽縣尹李□

錄事司官

從事郎錄□高章 司吏朱顯祖

□史王□忠 和按

缺學高□敬 司書萬無黨□□□李亮

天歷二年十一月廿四日記

創建武安王廟記

存正書元統二年七月在彰德府城西北隅觀音堂

案碑字鐫刻微纖下截又剝蝕文多不屬惟首載崇寧護國真君義勇武□□据元文宗天歷元年加封顯靈威勇武安英濟王此記在順宗元統初乃書崇寧護國真君義勇封號或順宗時又爲改易與後書建康行御史台諸路監察御史韓□□疑是撰文者名已缺元史百官志至元十四年始置江南行御史臺於揚州尋徙杭州又徙江州二十三年遷於建康以監臨東南諸省統制各道憲司記所云建康行御史臺是其職也其稱諸路監察御史亦由至元十四年置此員然微異於內察院者亦以諸路別之也後列長興禪寺住持比邱僧□德才書文太近俚稱曹公贈袍挑擎馬上諸語近戲場有挑袍雜劇蓋早見於元石刻如此

福會禪寺法堂壁記

伏天歷甲戌歲

魏武定間東安王婁叡爲道馮法師始卜相城迤西寶山之麓道場一區至隋有師靈裕者請額於朝扁之曰勅建靈泉禪寺降及北漢乾祐間緣地狹而僧眾遂分建一寺於相治之右卽其坊曰福會而寺因以名暨宋則奎聚□星□未幾金元繼作有釋曰法道載傳其教寵錫紫衣至元初□□釋廣懿傳之祖顯顯傳之法贊贊傳之智遇遇則志能以復遂建殿宇若干楹時得臨漳尹裴珪偕其幕賓劉源者捐貲以爲倡實天歷甲戌歲也案壁記略見於明正德重修福會寺碑所引其云魏武定間東安王婁叡爲道馮法師始卜相城迤西寶山之麓道場一區此寶山寺所起也又云隋有法師靈裕者請額於朝扁之曰勅建靈泉禪寺据靈裕傳石刻裕請歸於鄴文帝許之乃命左僕射高顯右僕射蘇威納言虞慶則總管賀若弼等詣寺宣旨代帝復受戒懺罪并送綾錦衣服絹三百段助營寶山寺御自註額改號靈泉與此記請額於朝合惟後題天歷甲戌歲天歷無甲戌此爲惠宗元統二年也碑文轉寫易爲傳誤耳又福會禪寺北漢乾祐間始建此寺而省通志以爲元元統建殆於不審其實矣

彰德路創建鯨背橋記



佚後至元三年夏

許有壬撰

聖朝既平宋經畫遐邇六都小邑枝疏脈貫際天所覆猶身焉政命之宣布商旅之通遷水浮陸馳舟格梁濟荒陬僻壤無遠不達猶氣血周流百骸用康一或壅塞則身爲之病矣故橋梁若道路路若府州縣皆專官董之歲時巡行而察其廢修此朝廷著令示爲政之先務也彰德實古相河亶甲所居禹貢冀州之域也世有廢興邑有改徙而山川之流峙形勢之雄偉津塗之要衝有不得而變者焉我朝爲路路則今制而名則昉自石晉宋若金皆因之郡直孔道驛傳屢屢涉尤劇郡北四里洹水所經夏秋受西山萬壑之流奔橫駛悍滅防鬻涖蕩然四溢官舟濟人而要需阻尼上曝下淖負挈奔渡擠排蹴躅輾彌中流湍湍及溺水涸作橋因肆掙斂聚良用惡薄覆弱搯行者阨隍莫不股慄歲一修拆民大有輸締構之用百才一二蠹財病民不知其幾年矣西域荀公凱霖嘗監安陽縣位卑力小有志未就余待罪中書適赴調京師嘗語及是慨然曰使不武長郡必作石橋余旣懲慙之且語之曰果成余爲若記俄陞路達魯花赤至元二年歲丙子春蒞事首號於庭曰洹橋病民毫倪具知爲永逸計非石不可且嘗請諸冬官冬官可之總管馮公思

溫繼至而同知阿藍判官毛刺真暨幕屬諸君莫不協恭贊畫乃相舊渡沙深水濶底難  
 爲植疏鑿引水人用重勞東一里水磴廢渠土性堅良面勢惟允基是締構事半功倍相  
 距幾舉武後先幾年莫有迹者目力一及若發薈物出莫不躍然以喜地爲天寧寺業世  
 不可牟也乃召其徒以其法語之曰佛以慈航濟渡故凡世之宏益於人者多若輩爲之  
 且聞有所謂八福田者若橋梁居其一焉則是役也若輩宜爲之况而地乎惟力之有不  
 及也其亦難強於而哉誠捐此地吾有司自爲之福田利益其亦肇基於若乎師徒聞之  
 聚而謀曰是誠吾徒之當爲而不能爲有爲者出尺寸地尙可靳乎相與署券入官約又  
 不畔旣得地以府帑贏息募工購材惟石之用以尺計者數餘二萬攻琢輸輓費勞實繁  
 得石水冷近而易致蓋昔產地也甃灰鐵鋌靡不具集安陽縣尹趙時敏實集其材復董  
 其役恪共朝夕用底於成經始丁丑二月凡四閱月而建其愜未廣而淺未濬卑未陲而  
 防未堅者明年夏始克訖功其長亘十五尋礎基於淵兩端礮岸中作三墩析水爲四而  
 銳刃其西以劈水怒四環順列一脊穹起植欄雨翼其廣可以行四車凡材假於民直有  
 未歸者馮公入爲邢部侍郎總管杜公德遠適來乃共發帑悉酬之予得請歸二公率其  
 屬請曰橋之成國家之福民庶之力而適歸而身履之昔之言今其酬哉予亦昔之冬履

危而夏冒險者也紀功示後記宜爲也况有言可食乎天下之事成於有志一僧子然而出儲無宿春植一標於荆榛瓦礫之場而萬間金碧不日突起矣天下之橋以雄偉名者多其徒爲之孰有儻天子之爵操得致之柄而反不若彼哉愚者不能詰者不爲也其或勵志率作而同僚嫉之上官搯之自非先之以定見守之以定力奮不顧流議而勇於必爲者鮮有濟焉初是役之興有言韓忠獻三守相凡渠水之利莫不修復使橋可作則必先矣蓋不可作也殊不知古人蓋亦有不及爲而後人爲之者未聞古人事事盡爲而後人無一可爲者也昔杜預起建河橋於富平津眾論以爲殷周所都經聖賢不作者必不可作故也預曰昔造舟爲梁則河橋之謂也遂作橋成則知古人之立事亦未免譁於浮議而成於定力也噫作者之難若是俾其功勿壞而施於無窮則有望於繼者焉旣爲記之又采輿之人謠爲之頌曰

洹水激激載伏載流始於濫觴俄而勝舟故爲悍肆奔騰喧颺揚爲驚濤激於堆埼坪馳孔殷商途攸出乘危將墜濟險慮覆歲犴日偷安斯匪今孰急其病而疚其心豈無徒杠亦有輿梁腴民之膏視爲故常膏腴靡恤事功奚益枯株槁壤載胥及溺乃有長人職思其忠心匪石轉詢謀復同浮言譏譏謂古有賢而不此作豈昧於前我不爾咎爾亦匪誣

安陽縣志  
我病誠切孰興孰除千夫運斤山石爲竭曾不逾時橫空巖巖集櫛比堅猶壘玉蜿蜒龍臥峇峇雲矗昔也江海今而堂閭僂僂絡繹晝提夜携凡今之人盍究所適且播未周夕求其實有爲遠慮人卽迂之惟略近效久大可期繼今有位勿怠其成水厭橫流岸虞善崩洄水泱泱頌聲洋洋百世而下於戲不忘

案記石久湮無存据至正集爲補其文鯨背橋者以洄橋改名經始於至元丁丑二月明年夏始克迄功倡始者荀公凱霖集材董役則安陽縣尹趙時敏實終其成記云彰德實古相河宣甲所居禹貢冀州之域也我朝爲路路則今制而名則昉自石晉宋若金皆因之舊五代史晉高祖本記天福三年升相州爲彰德軍置節度觀察使又王延允加檢校太傅充相州彰德軍節度使是記所据與此合碑又云郡北四里洄水所經夏秋受西山萬壑之流奔橫駛悍滅防鬻涖蕩然四溢官舟濟人而要需阻泥上曝下淖負挈奔渡擠排蹴躑躅瀉中流惴惴及溺水涸作橋因肆掙斂聚良用惡薄覆弱搢行者机隄莫不股慄歲一修折民大有輸締構之用百財一二其言實深切足爲大戒予故著其語以告司土者爲民計長久非在塗飾一時庶有賴焉

五龍廟碑

佚

中書左丞詳有壬撰

龍於天地間爲物最神乾首六十四卦獨是取象其以神變不測時乘御天雲作雨施蒸民乃粒功莫與京乎大塞堪輿小爲蠶蠅能短能長能幽能明者神之末也管子曰龍水之神者也乘水則神立則雖神物其亦擇所可依而後能神其神哉江河湖海固其家也天下之曰潭曰湫曰巖曰洞曰池者亦必幽深僻險有水可依而後居焉士人往往時見光怪不敢褻也而又旱暵有禱則從而祀焉彰德路安陽縣西北五里洹水之陽有五龍廟廟之下水黑而深洹水至是瀦而後泄其龍居之淵乎太原原元裕之效虞初書言明昌中風拔廟樹印地有蹟事頗涉怪而不及廟之建始何時其號五者具五方爲象設爾以其禱之屢孚也路達魯花赤荀公凱霖同知阿藍判官毛刺真嘗修其廢築臺其前至元四年戊寅夏旱甚甫事請禱六月二十日甲申總管杜公德遠始下車憂惶無措曰不才之來丁旱之會又數日不雨則苗盡槁人何食賦何徵責何以道盍走靈祠而禱諸荀公曰五龍廟効靈自昔協恭精禱神其憫乎於是率僚屬齋沐具香幣禱焉戊子行事雲乃起是夕微雨越翌日雨大作三日乃止苗之槁者淖而興市之閉遏者發人之轉徙者

息病者以蘇訛言以寂豐凶笑擧變乎旦夕既報祀安陽縣尹趙君時敏刻石以昭神貺以達邦君之休夫龍與人異處昔鬪涓淵子產以爲吾無求於龍龍亦無求於吾惟其無求則子產之言是已爲天子牧守其土養其民以供其貢賦而歲將告饑人將轉死苟可弭蓄當卽致其極則其能無求於龍乎且龍之托於茲水以神其神人象而祠之有年矣應捷桴鼓亦其宜也否則將不與博士縹芻等哉抑聞之雨由乎神而亦由乎人至誠貫金石信及豚魚况龍之神人之誠有不格者乎然而龍之德不可忘也祭法曰山林川谷邱陵能出雲爲風雨見怪物皆曰神洹水有龍龍能出雲爲雨祠亦宜哉書其概申以迎送神曲俾祀而歌焉其詞曰

洹之水兮神澗祠其埃兮惟其濼羗自珍兮神龍勃澤勝兮實所宮魃之虐兮蘊隆龜吾田兮稿吾稷種將竭澤兮及爾躬哀吾氓兮疲癯忍及喙兮弗充龍之怒兮奮飛豐隆前驅兮屏翳後隨騰清波兮淋漓沛爲霖兮鮮厥萋報祀兮孔時冷風肅兮滿旗鼓坎坎兮吹參差荷神嘉兮無期膏澤施兮不屯留其僕兮水欣欣牲之膾兮醪之醇琮深席覲兮縈燎薰享不儀物兮享以人龍之去兮遠巡噓雲氣兮氤氳歸九淵兮深藏歛大惠兮庇一方時潛飛兮則其常有扣斯應兮惟爾之臧百穀充羨兮遺秉在田龍兮龍兮人不爾

諫

案碑久毀沒今據至正集補入至元四年夏旱甚總管杜德遠與路達魯花赤荀凱霖協謀禱雨有應爲述其事如此凱霖見至正集西域使者哈只哈心碑凱霖字和叔擬寶慶路邵陽縣達魯花赤移彰德路臨漳縣臨漳終更移安陽遷林州達魯花赤陞奉議大夫彰德路總管府達魯花赤兼本路諸軍奧魯總管府達魯花赤管內勸農事丙子春旱入境卽雨和叔自謂偶然而民心是悅其來也作洹水石橋修公廡傳舍百廢具興云德遠見至正元年儒學雅樂記至元戊寅夏六月定興杜公由中書左司缺奉命以總管來蒞茲郡下車祇謁大成殿已乃與學官而進之詢以祀未有樂率□□爲錠者一百有三十造八音之器其製六十又四選儒生之妙齡俊秀者而閑習之禮行樂舉間奏迭作鏗鏘清越旣翕而繹審是則二君之爲政舉得其要故能致誠以感於神非是恐龍不爲靈也

□元後衛親軍千戶宣武將軍蔡君墓碑

并序

存正書後至元三年在城東羊汛村狄家閒院

翰林直學士朝列大夫同知制誥兼修國史李之紹撰

宣武將軍後衛親軍千戶上騎都尉濟陽郡伯蔡恕書

集賢院直學士朝散大夫一齋題額

□□□□□□軍千戶□□□□□□□□□□  
陽人國初郡□□□□□□□□□□□□  
□□□□□□至□□□籍諸□策名□卒□上□  
□□萬□謹□□□如別幅幸□先生爲文諸□  
方爲百姓□安陽不知其□從珎素饒拳勇習武事紹業未幾適親王□令辰武皇□  
□□壬戌□□□□□□南攻圍牛歲老僧□之戰麾下殺獲居多爾後鎮襄陽狗□□  
五□復漣海□□岳江□□少諸州□□克□□功□□□□□□□□□□是年受忠  
顯校尉管軍總把居無何權千□□冬扈太□□□遣兵士儲芻草築土室部下人□  
瘡痍畜免饑踣軍府卒賴其用塗行遇凍者必扶入密室溫煦之軍□□□□□□  
□□以致困餓死□□□□□□□□□□事民不知擾下至草木無纖介損□□□□故  
近臣以君號令嚴肅爲對□□□□□□□□□□宴廷□□井死□□□□墜而已累□山  
東宣慰索充海道都漕運萬戶府都鎮撫度□□□□□□□□□□長易符□□□□□□初□□





安陽縣志  
珎之子不稱男某又不情人填諱乖於禮矣李之紹元史有傳延祐四年陞朝列大夫  
七年召爲翰林直學士碑與史符至同知制誥兼修國史傳未之及題額者稱一齋書  
號而不書名未知所謂也碑壅埋土中文多剝落有云父興又云珎素□拳勇証之元  
史本傳書其官位行實相符惟碑言累□山東宣慰□傳失紀此官又言至大進武略  
將軍辛亥二字並爲一字是爲武宗建元之四年傳言元貞元年進階武略殆不審矣碑  
後言彰德帥怙權力擅殺帳下將士二人以剛直忤眾或譖之曰是□外叛遽命引出  
戮之公趨拜言得釋二人終身感德命其子服蔡君之喪衰服三年本傳略此事不書  
珍諸子可見者尙有忠珉瑛惟恕以襲職附見珍本傳末行題至元□□□次丁丑案  
前至元三年亦爲丁丑今決爲後至元四年丁丑以碑言至大辛亥尙進階則知是碑  
更後於此故立石日爲後至元也碑在某氏家墓卽近此命役夫發土出碑拓數紙仍  
爲掩置居人宜善護之

安陽縣金石錄卷十一

偃師武虛谷先生著

安陽縣知縣鐵嶺貴 秦校梓

有元贈□奉大夫湖廣等處行中書省參知政事護軍追封魯郡公許公神道碑銘

有序

存正書後至元四年八月

安陽公居政府之五年一日得請於朝既釋機務將歸省其先塋於洹水之陽以顯考魯公行狀命其友歐陽玄文諸神道之石玄惟方今公卿大臣辭翰擅美無以右安陽公兩都有大營繕諸臣僚家先世碑板咸以奉請屬筆安陽公爲榮於法當援吾宗克文忠公例自表厥考崇公之阡又自書之爲宜安陽公堅辭以爲不可乃勉叙其行實而銘之魯公諱熙載字獻臣姓許氏生七歲孤太夫人挈之依外家公弟有異質處羣髻中終日持重寡言稍長攻讀書習爲傷二十能舉子業有僑譽年及受室娶里中名家外舅仕湖廣行省公欲就學東南因往焉遂爲當道所知以行省檄辟德慶路提控按牘由是以本職歷永衡兩路湘潭一州凡三考成資調長沙稅使遷臨江撫州兩路總管府照磨進將仕郎湖廣行中書省理問所知事改從事郎會福院照磨兼管句承發架關庫位不滿德而

所至稱職吏服其能民懷其惠不可悉數其一二存諸簡書略見始末者若在德慶時鄰  
獠軼境州將趙往督捕府無宅官以次攝事公料丁壯輸糗糧高城深池備禦有法會城  
中民饑比持狀請粟而先以賑貸民用無宅虞將士俘鹵有愬非辜宣慰部使者雜譏之  
渠帥利所獲從旁執爭公駁之曰寇徒脅從猶當理出王民躍入賊眾又從而滅獲之可  
乎上官用其議薄有□驗皆免爲民□是公以新進下僚代總郡寄一切興發事皆已出  
當道意頗□之寇平吏民咸稱其應變方略有餘又見其面折元戎脫民於殍乃更賞嘆  
共剡薦之□丞丞尙巫鬼里社昇土木偶相昏□服食共具以侈相夸民坐凋劫公臬樊  
侯毀淫祠數百區以窒其妄又撤其材以給費舍公廡倉庫之用公私便之在衡安仁盜  
袁舜一怨苦播州餉負險挺亂旣誅朝廷宥其餘黨甚眾民有越軍砦爲竊攘者有司得  
之獨以強論不赦公曰彼從盜爲亂猶貴殊死此因亂爲盜乃服上刑不□請併徙舍之  
議上卒從其言□□□有范重二者嘗過友家乘虛擲□供佛鐵器以歸友蹤跡甚□  
范慚怖而返之物游徼發擿之拘范及友於官公推讞得實旣而有赦吏欲墨范臂景跡  
其□公謂詞未送官物先入主法不□亦不當錮范卒爲良民在長沙征算不苛羨增秋  
毫歸官□撫州豪民有龔胡者僞造楮幣十餘年轉鬻閩浙聲已狼藉計蹙自□官疑有

隱索之關地□宿用板印緇數皆倍所首獄輸朝廷遣使分道處決龔厚賞祈免姻族又助其營謀已議減死公持不可曰首寡隱多去未存本與未首同眾莫能蔽乃寘諸法末奉祠在京祠祿優暇而年近休致諸子又皆顯融力請謝事未報得痞疾薨於官生以中統二年辛酉十一月丁□薨以泰定四年丁卯二月癸酉壽六有七葬以是年十一月壬午附安陽武官原新塋許氏世居許昌曾高以上金亂矢譖祖考隱德曠僚諱信考贊彰德湯陰因徙家焉初贈亞中大夫彰德路總管輕車都尉追封高陽郡侯再贈嘉儀大夫僉書樞密院事上輕車都尉追封魯郡侯諱毅妣以孫婦趙氏讓封初追封湯陰縣君再封高陽郡君累封高陽郡夫人進封魯郡夫人姓宋氏公初贈嘉議大夫禮部尙書上輕車都尉追封高陽郡侯進贈中奉大夫湖廣等□行中書省叅知政事護軍追封魯郡公配高氏萬寧縣尹榮之女初封恭人再封湯陰縣君累封高陽郡君進封高陽郡太夫人追封魯郡夫人恭謹令淑孝敬事姑惠慈睦嫻性多慙惻□樂施予聞故舊家有喪致廢飲食拯閭里貧病如拯溺焚魯公待客好豐諸子隆師蓄書嘗鬻簪珥以繼其資雖居中饋經營彌縫能使夫子處約之久不失令名有古賢媛之風焉至順四年辛未五月庚子卒□□州壽六十有七□僉書而下皆以安陽公貴推恩伯子有恆大寧□傳學正謂大

理路軍民總管府知事篤於養志力於幹蠱魯公年四十不親細故內獲夫人儉勤之助外藉伯子開敏之資□□安居樂道傳致教子以有今日先魯公祥之二日卒年四十有五時論惜之娶李繼狄集賢直學士文忠之女仲子有壬是爲安陽公登延祐二年進士第初授同知遼州事歷山北廉訪司經歷吏部主事南臺內臺監察御史詹事院中議中書左司員外郎右司左司兩郎中兩淮都轉運鹽使兩爲參議中書省事治書侍御史陞中奉大夫兼奎章閣學士院侍書學士同知經筵事拜中書參知政事轉通奉大夫以本官知經筵事在位有相業臨事決議不愧古人以封讓祖姑者其初娶景州儒學教授承平趙兼善女金源世科進士家也繼室趙氏銀青榮祿大夫中書平章政事魯國公世延女也並封魯郡夫人叔子有儀經筵檢討武昌水陸事產副提舉娶劉平江知州傑之女季子有孚國學上舍生登至順元年進士第授承事郎湖廣等處儒學副提舉改湖廣行省檢校官娶張繼賈安慶摠管汝□女也女二長異貞適江西行省都事趙彝次安貞未稼而卒孫男四寶山燕山白者黑者孫女五小茶三茶增茶順茶相茶公器識深長學問篤實內行慎獨外交盡忠性不能酒長夏盛暑衣冠儼然書不釋手爲貧謀養不擇祿位仕間關外補四十餘年僦屋以居糴市以食親故嘗靳之曰君位劣祿薄親年又高何捐

介至是公笑曰爲臣當廉何有大小之別記獨不云小臣廉乎宋夫人年二十八居婺守節自誓迄公成人教育甚至公逮事終身子職無闕司征長沙作綵衣堂以志其樂宋夫人病利力求去職侍疾寢食爲廢初喪號慟絕而復蘇旅殯原上苦由廬墓者三年每晝端坐木下狀如泥壞樵夫牧豎迫而視之始驚爲公年踰五十時祭必哭哭必致哀喪禮做古不用緇黃人始議其儉及送終之厚祀事之豐莫不願習行之旣祥非疾病蔬麪不御臨江之除訝吏再四必後其妻孥守邱壠乃去今長沙人卽公廬墓之地作書院以表其孝請於中書得丞額所植松栢愛護之成林晚歲研精理學易簣之年正月朔日命諸子講周子大極圖說至原始反終慨然而嘆因論人世修短有若將終焉之意舅氏宋君寶蚤年擇師訓公遇若己子公迎養以禮有子爲娶令族俸入盡以資之□□□□東程岡因以東岡爲號後更號真拙著經濟錄四卷女教六卷尤長於詩有東岡小葉傳於世仁廟初策進士漢人賜緋者十有一人唯安陽公年則二十有九父母俱慶時人歎之每以爲義方之勸公在會福安陽公官已卿士而公身教嚴厲安陽公出入必咨廩然前修家法公疾禱神謁醫靡不卽至公薨貧不能治歛又思得美檀哀慕不知所爲朝廷聞而厚賻之始克歸塋墓土未燥安陽公數遷遂至宰輔故贈親之典備極哀榮惟公生

平種德行義自厚於躬而逸巡退諉未嘗有幾微責報於天求上於人之意迨夫積善之報在理必然則人固莫之與京天亦莫之或違也狀公行者爲今南臺侍御史濟南張公起巖志公曠者爲今御史中丞浚儀馬公祖常至玄爲神道碑三人皆安陽公同年進士嗚呼斯亦他貴臣家所難而魯公有焉銘曰

允矣魯公生而敦龐爲傷則通治吏不厯儒通不窮若歲徒枉吏廩則蒙乃昏然釭發聲粵禺初武之覓嬰身事衝不震不撓憂民有忭遇事無懼或縱爾于罟或逸爾于鏹或鱗爾控伺或鞣爾幻曉世涂憧憧公志控控爲于颯颯與俗琴腔且行且□孰搏孰控盤桓令終德厚信疋荆士景從鹿隱維龐江夏向風黃孝無雙醜河爲繼導民爲江濊源之鴻沿流縱縱高陽豐彤庭堅囂降仲才棟隆仲力鼎扛公也亢厥宗仲也爽我邦洹水泚泚太行崆峒頡山爲雄厭水勿涿若堂其封堅珉如玨石人戲礪其樹如幢仲詞春容銘諉友憲公當如崇仲

翰林侍講學士通奉大夫知制誥同修國史兼國子祭酒歐陽玄撰

翰林學士承旨榮祿大夫知制誥兼修國史趙孟頫書篆

能靜處士茅紹之□勒



至元四年歲在戊寅八月吉日建

中州文表昌欲謁安陽公墓以事不果從史云墓有公神道碑高丈二尺餘四面各可四尺皆有字趙文敏公書也昌使之拓墨本以來迺安陽公之父魯郡公墓碑歐陽文公爲文茅紹之集文敏書刻之安陽公終迺無爲文刻之碑者

中州金石攷引

中州金石記許熙載神道碑至元四年八月立歐陽元撰趙孟頫正書并篆額在彰德府城西北熙載有壬之父有壬旣貴乃爲父立碑張起巖爲行狀馬祖常爲壙志歐陽元爲此碑三人皆熙載同年進士孟頫字亦極工整是生平經意之作古人書撰碑碣但自書銜無書通家子姪等字樣今人則用之何積習之難返也

授堂金石文字續跋追封魯郡公許公神道碑載許熙載字獻臣初以行省檄辟德慶路提控案牘由是以本職歷永衡兩路湘潭一州凡三考成資調長沙稅使遷臨江撫州兩路總管府照磨進將仕郎湖廣行中書省理問所知事改從仕郎會福院照磨兼管勾承發架閣庫熙載有壬父也附元史有壬傳後然書其官階甚略又傳云熙載仕長沙日設義學訓諸生旣沒而諸生思之爲立東岡書院朝廷錫額設官以爲育才之地以碑考之有壬喪母宋夫人旅殯原上苦由廬墓者三年後長沙人卽公廬墓之地

作書院以表其孝請於中書得承額然則書院賜額爲有壬孝思所致與史所書不符豈由當時木入刺沙搆怨言以書院不當立而爲文者故有微辭與傳載有壬二弟有儀有孚碑書有儀經筵檢討武昌水陸事產副提舉有孚國學上舍生登至順元年進士第授承事郎湖廣等處儒學副提舉改湖廣行省檢校官皆足補史傳書官之略案碑少有剝損惟後載能靜處士茅紹之□勒勒上一字鐫鑿無可仿据中州文表及郭文簡並云集趙文敏書是集勒也紹之與文忠同時見至正集有同茅紹之飲野人家疏圃二首詩卽此碑題能靜處士者觀其與許公偕遊可以微似其人矣後又載至元四年歲在戊寅以紀年彙考推之是爲後至元中州金石記授堂金石文字續跋悉列入前至元是時許公猶未降生也許公以至元二十四年六月生迨後至元四年立碑公五十二歲距家魏國公之卒在至治二年六月已十七年矣二跋皆沿於不審戊寅紀歲乃致此誤故書之以爲考古者戒

元鐘識

存正書至正五年正月今在府城隍廟

案鐘識上層八方方各一字皇帝萬歲宰臣千秋下三方各有識文云彰德路安陽縣

西關勅大上清正一宮太歲乙酉至正五年正月上吉日謹誌銅山鎮匠人王通大上  
清正一宮卽今西關西北里許白龍王廟元時正一宮舊基也

彰德路儒學營修記

存正書在彰德府學後至元四年

彰德路儒學正燕九萬學錄許中行貽書有壬曰九萬缺四字据至正集補何以承學缺

字事鄭大夫

是賴歲丁丑秋監郡荀公以上丁祀近獻官行事待次有缺一字而茲缺一字惟缺

橋字凡之則稱敗之人用怨讎大非所以事神也乃命錄事任允中董役作

屋不浹日而缺入字有次人永無撓矣明年五月又以廟門木朽不任啟閉仍命

任允中缺十二字新垣之缺者完之廟宮崇嚴士民改觀缺一月總管杜公始殿

謁而塗缺十三字趙時敏填其罅圻其墜尙懼不密復作承塵爲板凡四百

方士子安昔之缺十數字也敢請有壬聞而喜曰善有小乎禠其小不缺三字大

者缺一字國制有司主缺八數字下主者缺一字如其缺一字一弊必修一墜必舉者有三缺

字幾萬教典缺一字故缺一字身雖缺一字而目不一缺一字善非缺一字矣而其大者可不

最哉詩人頌魯僖公缺一字蓋嘗三復缺一字有說缺一字穆魯侯敬明其

德敬慎威儀維民之則又曰明明魯侯克明其德缺七字又曰廣德心缺五字夫明修治缺

而缺五字上之人以身修而缺四字後者其亦有缺一字意缺八字若夫仲也以身為教缺一字進缺一字

之功至矣推以覺人人是效缺四字是克廣是心缺一字其缺一字矣大學明德新民之事也

上之所以教下之所以化缺三字於是哉缺三字是已學之學者缺四字乃者也孔子天也不

可階而升也而見二字諸詩書易春秋缺九字者皆學而升者也缺三字詩明德之要其

當致力缺六字之先是為教缺一字儻公不缺六字專美矣非魯之多士乎不是之求而或

詞華之是訓缺七字功利以干譽缺十一字錄節以適廣舍萬間無益也相古明郡也宋則

忠獻韓公缺六字與設兵毀缺十二字國初興修已已總管王遵重建繼之營修者時有

人焉缺十字惜其不得也缺十字苟公名凱名德遠缺三字二公之有志於學士之歸美

其上缺十八字可書也書頌也書無規可乎其益勗其大者哉

至元四年歲在戊缺一字九月吉日通奉大夫前中奉大夫缺六字榮大夫知制兼修國史趙

孟頫書缺下字

案碑損泐校以至正集為補全文如右但後題銜至元四年趙孟頫書亦鄉曲粗知習

其體者冒名為之然不審家魏公當至治二年六月卒已久矣縣士人尙奉為魏公遺

翰故不可以不辨

彰德路廳壁記

存正書後至元五年十月在縣署

彰德河朔之雄郡也守茲土者率多□□□□廊廟之名臣故其廳事宏□壯麗□  
□郡皆□□□久漫患弗飾至元五年乙卯監郡萬家奴刺公總以杜德遠太中同知忙  
兀海牙朝列判□毛刺與□襄推府□璧宏德經歷王翊承事知事王敬將事照磨王公  
弼相謂曰府治者宣化讀法之地理政教民之所昔之創建守其營模可謂大且勞矣今  
見而不修治之豈惟廢前人之績貽將來之誚抑何以聳民庶之觀瞻乎同寅諸公咸唯  
唯共爲之於是庀益興事撤故易新梓匠朽人眾藝偕作浹旬之間輪焉奐焉官舍一新  
之後而政令亦一變其故矣凡工商物置悉發公帑以給之無虛取於民者蓋府之營□  
□諸公之來則節約用度積以爲營繕之資是以□□雖繁而民不知擾也又造公用什  
器凡若干皆□息之利也於戲一事必實益於官一物不虛取於民君子曰處官事如家  
事愛百姓如妻子諸公其□焉且命僕爲記勒諸翠珉以告來者俾相續於無窮其公勤  
節愛憂深思遠可謂至矣彼視公家爲傳舍者聞諸公之風亦將有感而興起也今列所

造什器等事於左至元五年己卯秋月吉日安陽尹趙時敏記

本路營運官本中統鈔壹阡貳佰叁拾貳定叁拾柒兩柒錢

赤金壹盞貳付計重壹拾柒兩肆分白銀帶蓋索壺瓶貳隻通重伍拾兩白銀壺瓶叁隻通重陸拾兩銀缸壹隻壹付通重伍兩柒錢伍分銀甄樣臺雙盞壹付通重柒兩□□銀□臺盞貳付通重壹拾兩白銀孟子壹箇重壹拾兩銀孟子壹箇重柒兩鍍金銀瓜盞壹箇重四兩叁錢□鍍白銀香盒壹箇重柒兩四錢鍍金白銀香爐壹箇重壹拾陸兩貳錢白銀水甌壹箇重肆拾貳兩伍錢白銀盆重肆拾兩白銀交椅貳把五□銀交椅壹把脚踏肆箇內銀釘金釘壹箇銀□花釘壹箇銅釘貳箇雜色絨錦條褥肆拾叁箇花布條褥壹拾叁箇篔簹皮條褥通壹拾壹箇鴉青紗幪并暖帳新舊陸箇新舊雜色頂幔壹拾箇門簾陸箇雜色錦座子肆拾叁箇篔簹皮座子新舊肆拾柒箇紅綾并紵絲等被兒壹拾張白氈五領花毯貳拾肆箇絨錦搭椅柒箇銷金門額彩色柱衣陸件首錦察褶兒壹箇彩色雕花細酒棹并心紅大小酒棹叁箇幃幬床貳張心紅等兒棹兒柒拾叁箇大小鐵鍋紅漆盤仗等物壹阡叁佰玖拾玖件

分司暖帳頂子玖箇雜色條褥陸拾肆箇雜色座子壹拾捌箇門簾陸箇紅錦被肆張白

細氈肆領大小花毯貳拾肆箇鴉青紗褥陸箇鑰銘盆銅鐵□盆柒箇心紅小棹肆箇  
諸雜什物壹伯件

在城驛鈔臺蓋壹付壺瓶壹箇孟子壹箇通重白銀貳拾肆兩陸錢鋪陳等物叁伯捌拾  
件付物肆伯貳拾陸件

至元五年冬十月上旬吉日安石本路司 王思義書

提調劉秉 胡 董安陽張景立

案河朔訪古記彰德路總管府故老相傳黃堂廳事肇啟建於節度韓重贊宋太宗歸  
自河東視其廳曰朕之所居亦不過也上欲留宿重贊奏曰臣以一方之力積歲成此  
今陛下居一夕卽虛之矣不免勞民重建乞賜守臣豈勝榮幸上乃命設幄宿於廳下  
而去至魏公大加完飾郡廡園亭雄壯華麗甲于河朔故此記云府治者宣化讀法之  
地理政教民之所昔之創建守其營模可謂大且勞矣蓋指此也又稱監郡萬家奴據  
偃師金石遺文補錄達魯花赤鎮弼公去思之碑云我元德暢九有際天薄海治仍古  
郡縣而百司庶府某布星列每正貳之上以國人一員總之猶古之啟監焉與元史百  
官志牧民者曰路曰府曰州曰縣其長則蒙古人爲之而漢人南人貳焉者其旨相合

故達魯花赤在郡則爲監郡在縣則爲監縣近人多昧其義是以爲著於此  
彰德路儒學雅樂記

存行書至正元年二月立在今府學

嘉議大夫陝西中道肅政廉訪副使郭思撰

亞中大夫河河南道肅政廉訪司事杜

正議大夫書御史同知篆題

相爲河朔名郡州學之置自古昔至於聖朝有國列聖相承尙文崇教變出前代郡在  
邦畿風之盛日逾一日茲可以見皇元之德大以洽孔子之道尊而明也然春秋薦享  
稽諸祀典備三獻而闕九成者亦有年矣八音之器不克具與抑具器而  
未及舉之與將事幾之會必有待乎其人者也至元戊寅夏六月定興杜公由中書左司  
奉命以總管來蒞茲郡下車祇謁大成殿已乃與學官而進之  
詢以學規且右克諧堂者何燕九萬學祿許中行合前總  
管郡以祀未有樂率爲綻者一百有三十製  
之造八音之器其別六十又四既未用公遷意故



貯此耳公既詳其本末謀舉而用□□□□同知府□□□□諸公咸曰日□□□通  
□□既頌□□□□□□□□□□吾輩事况雅樂素具又一□□也特教肄之功耳復  
□□□□□□公訪之縉紳□□傷求□□律呂者適會前太常禮儀□□□□□□  
□□里延致以禮典正音節選傷生之妙齡俊秀□□而閱習□□□□□□□□監  
郡□□等皆曰可矣廼以己卯春二月□□□□先聖先師金石在縣絲竹就列禮行樂舉  
間奏迭作鏗鏘清□□既翕而繹升降拜起維序以和遠近觀聽□□欣慕向教□□□□  
□□□□□□學錄許中行跡其事來請紀實予聞公之爲治一本□□德安靜悃幅不務名  
聲吏畏而□□民安於善可謂有古循良之風□□□□□□□□□□□□□□□□  
報本復敦化於揚俗意者將漸仁摩義浹肌淪膚宣太平之澤卽□□□□□□□□□□  
□□□□□□□□□□□□□□□□□□□□□□□□□□□□□□□□□□□□□□  
自出其平日所蓄積□□□□□□□□□□□□□□□□□□□□□□□□□□□□□□  
政之易成豈不在是予與杜公嘗同爲御史柏臺又嘉二公之賢□□□□□□□□□□  
事書以示後  
之人謹記

朝列大夫彰德路總管府達魯花赤兼本路諸軍奧魯總管府達魯花赤管□□□□

三陽縣志  
三  
□□訥

太中大夫彰德路總管兼本路諸軍奧魯總管管內勸農事杜□□

朝列大夫同知彰德路總管府事□□

承直郎彰德路總管府判官慕瓚

雋林郎彰德路總管府推官趙璧

通仕郎彰德路總管府經歷□□

將仕佐郎彰德路總管府知事□□

將仕佐郎彰德路總管府知事孫居仁

彰德路總管府提控按□兼照磨□□

至正元年二月日教諭王克彬學正李允中學錄許中行張師顏真學徐孺

案碑半漫漶不可屬讀中州金石攷存其目云府學習雅樂記至元己卯郭思恭撰者  
卽此碑也今碑前列銜嘉議大夫陝西□中道肅政廉訪□副使郭思□撰尙存一思  
字彷彿可見然金石攷作至元己卯蓋修雅樂之年其立石在至正二年竟攷之未及  
矣碑言春秋薦享樂闕九成据天歷二年置雅樂講堂迄至元己卯僅十三年何爲廢

焉不講此有司之過也予改錄其廢興之由屬勸於當事者前題郭思恭撰見至正集  
故集賢直學士兼國子祭酒郭公墓誌銘拜監察御史出簽燕南河南兩道廉訪司事  
歷雲南漢中淮西三道副使與此稱陝西漢中道合  
彰德路儒學雅樂記碑陰

存正書

錄事司義

夏 男王守中王守明

村地壹

畝叁

以備春秋

用 施中

祭 樂 用

雅樂生

名開 于右

第一層

誠

安

陽縣

祥張

誠

缺

第二層

希聖

王 中徐思敬張奉申王

肄張毅

李諒 張

周 缺

第三層

胡 高明 李謙

缺

第四層

許祖 鞏炤 福 張

張

缺

案碑陰殘字皆記當時習雅樂諸生名氏太不相屬姑以元刻存之

草堂杜公南游紀行詩

存正書在府學明倫堂至正二年六月

苑封連青瑣宮桃蔭紫苔薇垣輝內座華蓋暎中台文化隆千古  
□流洽九垓鶯歌春睨院鳳舞畫瑤璫柱史嬰鱗諫□臣錫燕回春秋元凱癖史記子長才西謫巴山道東游浙  
水隈□雲□倚仗見月獨□臺□語僮能會鄉書鴈不來荒荒暝色起冽冽疾風頽□寢  
聽猿□□□助□哀青燈寒照雨香篆暝飛衣髮短思□白詩成仗友裁對花休□淚置

酒強銜杯燕趙雲天迴甌閩島嶼開官甌星火急民病□肝摧漕海舟驚覆租田水湧災  
廩儲殫籩合鼎餼得鹽梅玉□調三統皇猷叙五材小臣南斗下拭目望蓬萊 礎湘雲  
生壁庭空雨長苔清秋探禹穴曉日望天臺跡隱開三逕神遊邀九垓翔鸞雙宛轉舞鶴  
獨踞瓊芝室虛生白□舟晚棹回鹿麋傳野性鷓鴣足英才散髮長林下流觴曲水隈草  
荒吳子國兔走越王臺陵谷嗟時變江潮送月來地晴村逕出溪漲岸沙頽諷詠休文威  
□臨□□哀丹砂能點鐵螢火不成灰鄧士蘭常佩吳姬錦自裁□□□淚遙上萬年  
栢御柳春煙覆宮桃曉□□□鄉夢覺花落人心摧忝祿慙無術占年幸不災茹芝頻  
采菊□遠重□梅天上廟堂器人間樗櫟才鷓鴣笑斥鷃飛息在蒿萊 螢火□依草鷓  
涎冷篆苔星樞高璣極雲路穩登台象□□雙闕奎章曜八垓衣裳垂黼黻千羽振鎔錫  
應障南飛去□旂北狩回守成思□業爲治□□□繞蓬山域龍翔折木隈翰林通禁  
省執法照中臺雲影日邊□玉帝天上來崑崙□地□□柱障□頽歌鳳傷周末書麟重  
魯哀月宮□□□□□□□灰□奏□□□□五色裁□□□□□□□地遠  
君親□□□□□□□□□□□□□摧□有豐稷慶人無天札災官鄉□□□□  
□□□梅松菊家□夢榎楠棟宇才携琴□故隱三徑久荒萊 □□□□□□□落石苔

□山分岳瀆地位列星臺文質承三統恩□□八垓翠□雲縹緲□□瑤璣氣轉洪鈞  
 秦陽生斗柄回朝廷繩祖武草野得人才鳳□形庭下芝生玉陛隈□□路寢□脩候  
 □臺□□傳宣出儒臣進講來會同星拱北□報日西頽□□知耕□豐年不□哀月涵  
 雲母影蘭藉水沉衣國典中樞秘□書上帝裁□□□□□□□□□□階薄□  
 □當殿開□□峩□□□□□□樂□崇德調元重弭災避人焚諫□□對宮□  
 □□□無寶□秋楚有才龍光深雨露詩賦北山萊

右草堂杜公古詩四首僉浙東憲時所作也雄渾典雅冲澹和平□□義所發關繫  
 豈不重歎方今□□□明夏□□頌復作於唐虞世矣公相人名□□字德□□  
 □□□□□□公曾孫也緱山文學據章伯蕃書以刻石□□□□□□□□□□至  
 正二年壬午六月二十又五□前進士 缺

案石刻殘剝後有跋語亦斷脫其云公相人名□□字德□是為杜秉懿也此詩為僉  
 浙東憲時所作然其歷官證之魏公神道碑秉彝為奎章閣學士典籤博士兼經筵官  
 與修皇朝大典拜陝西行臺御史即詩所謂翰林通禁省執法照中臺也其後為中書  
 叅知政書則見元史順帝紀實當至正十三年四月此刻既殘秉彝名又字僅存一德

字證之河朔訪古記是爲字德常也

彰德路重修孔子廟記

存正書至正四年七月立在彰德府學

太中大夫禮部郎中趙亨撰

進士承務郎彰德路總管府推官杜彥禮書丹

中憲大夫同僉太常禮部院事趙期頤篆蓋

國家詔天下郡邑皆立三皇孔子廟然伏羲神農黃帝皆以聖人得天位故其功德被天下後世孔子雖聖人不得位亦其功德被天下後世不然豈得與三皇並隆而享萬世廟食也是知孔子之得祀於天下者不以位而以德嗚呼盛哉然廟而不於否彰德河朔各郡距府治西南一里舊有孔子廟宋魏國韓公實經理之金源氏之季蕩於兵國初興復而未宏故厥後郡守王遵大加修建逮今又七十二年矣至正元年京兆王公由監察御史中書刑部爲總管公儒者也讀書能文章始至廟謁孔子像設色采  
□濂殿陸圯毀而且狹隘春秋行事登歌宮懸陳□□□□廡□陋□□閣傾仆師生廩

膳不給□養非宜願謂僚案曰廟不修□□□□□□□□□□廟學弛壞吾黨曷以道其責乃與監郡□□□□□□□□不花判官慕瓚暨開府使佐詢謀僉同合志協力捐修□□□□徵庸陶甃市材改作東西兩序爲屋十□□□□□□□植北麗增廣階陛倍尋有奇禮行樂作恢乎餘地更飭孔子暨十□□□□神位肖貌正配並列殊失倫紀且鄰國□□未登□□□□稽祀典至是增像二公合爲四配東坐西向以安神棲繪□□子後世大儒三十四人於東西序神幄供具禮樂之器咸一□□□□既訖功公乃躬率僚吏學師弟子釋奠於先聖先師增置學田伍拾畝蓄本錢若干經以廩師生由是郡之俊民皆興於學□□□於化民成俗之道可謂知所本矣始公之來值歲大旱隨禱而雨逾年又旱請於朝得錢爲□一百萬半以市米半爲細錢籍饑民八萬四千五百餘戶計□月給所活詎止億萬計是歲詔免所屬租稅絹爲疋八千四百三十八絲絮斤計五千九百包銀四百米六萬餘斛蓋從公累章之請也□有鬻子□□□□□贖以已貲歸其父母襄河爲患疏鑿六七里溉田數百頃民患旣去而且得利迹是皆公爲政之大凡也孔子論治國之要□□敬事而信節用而愛人凡是數者豈非敬信愛人之事乎自非文□明於理而勇於義力行□學而不惑者疇克爾邪余嘗爲部□□廩問郡邑所至首揭孔子廟



□學聽講每見長郡邑者視廟學之□□□以爲不急雖有孔子廟或怠於修治雖設學校失其所教養餘每進主者而□□之雖黽勉從事率多具文今公能□□學既新孔子廟又爲經營學事俾有恆規又能推孔子之道□爲政是皆可書也故因記廟學併及公之善政一二者於以見儒者之効云是爲記公□□事判官張允恭董之教授楊仲□□贊成之公名由義字仲方同州朝邑人今爲兵部侍郎至正四年七月朔日記

儒學教授林威學正王受益學錄胡恭直學齊克順學□王□□立石

案碑前列太中大夫禮部郎中趙亨撰進士承務郎彰德路總管府杜彥禮書丹中憲大夫同僉太常禮儀院事趙期頤篆蓋以篆額爲篆蓋金石文異例也趙亨文亦疏達其叙總管王由義興學始末特詳碑云國家詔天下郡邑皆立三皇孔子廟元史祭祀志中統二年夏六月詔宣聖廟及所在書院有司歲時致祭月朔釋奠元貞元年初命郡縣通祀三皇如宣聖釋奠禮此其事也又云邠國□□未登□□稽祀典至是增修二公合爲四配東坐西向以安神棲据祭祀志延祐三年秋七月詔春秋釋奠於先聖以顏子曾子子思孟子配享而此碑猶云邠國□□未登蓋郡縣奉行猶未如條詔也碑末書始公之來值歲大旱隨禱而雨逾年又旱請於朝得錢爲□一百萬半以市

米半爲細錢籍饑民八萬四千五百餘戶計□月計所活証止億萬計是歲詔免所屬租稅絹爲疋八千四百三十八絲絮計五千九百包銀四百米六萬餘斛証之元史順帝紀至正元年三月彰德路安陽等縣饑賑鈔萬五千錠四月彰德饑賑鈔萬五千錠王君至正元年蒞彰德卽始來歲旱也紀又言二年二月彰德路安陽臨漳等縣饑賑鈔二萬錠卽碑云逾年再旱也王君以累章之請爲民恤患如此然不得見於史文殆良吏傳所云元自中世以後循良之政史氏缺於記載是也故予爲悉書之別見於循政記

重修廟學碑陰

存正書

前任僚案

朝列大夫彰德路總管府達魯花赤兼本路諸軍奧魯總管府達魯花赤管內勸農事萬家訥

嘉議大夫彰德路總管兼本路諸軍奧魯總管管內勸農事王由義

朝散大夫同知彰德路總管府事闍里不花

承直郎彰德路總管府判官慕瓚

儒林郎彰德路總管府推官趙璧

承事郎彰德路總管府經歷李克讓

將仕佐郎彰德路總管府知縣孫居仁

彰德路總管府提控按□兼照磨王讓

案碑陰載彰德總管府僚案與至正七年刻漏銘碑陰相同惟提控案牘兼照磨不帶承發架閣微有異

安陽縣金石錄卷十一終

安陽縣金石錄卷十二

偃師武虛谷先生著

安陽縣知縣鐵嶺貴 秦校梓

遊三臺唱和詩賦石刻

存正書至正四年立在彰德府學明倫堂壁上

侍左轄先生遊三臺懷古有述 衡陽馬熙明初

星黃日懸秋聲豪衝漳經鄴波滔滔阿瞞□正欲□事築臺遂記當塗高前爲金虎後冰  
井銅爵中居更高迥□□宮闕令諸侯遠攬荆吳作藩屏舳艫煨燼投烏林東風假便機  
尤深□□不斫公瑾脰夢裏愛妾良苦心天昌帝胄振西蜀力挫雄圖成鼎足登登九仞  
竟何如一簣未完難進覆晚年二豎巢膏肓私擬周文王子來神助在至德此宮杵鍤皆  
民瘡分香遽作妾婢語豪氣彌天僅如縷而堂而構付忘言了事佳兒應默許馮高珠翠  
已晨星謾期朝夕瞻西陵食槽二馬忽歷塊霜蹄一蹴崇基傾舞陽亦是狐媚者身後同  
□羯奴罵經營次第屬中山不改漢年唯有瓦趙亡燕滅葺者誰構未解□鮮卑兒寧知  
滿目盡禾黍梵宮琳宇又據之往年讀史殊草草此日登臨陪國老酒闌歌罷投荒村說

與西山應絕倒

次明初韻安陽許有壬可用

匡朝本是人中豪誰令倒海流滔滔炎劉火力盡資土簣進欲興天俱高谷陵變遷劇改井乃有殃池尉遲狃狂圖一旦雖幸成惡跡千年豈容屏臨江率旅空若林銷沉兵甲江水深只言拊手天下定不知吐哺誰歸心當時勅敵無吳蜀蹴踏乾坤勞一足果然蔓草猶難除傾矣天仍不爲覆漢家病已深膏肓不能王人人自王坐令流毒徧四海重爲屠戮輕爲瘡荀公初信退讓語瀝膽披肝陳覲縷壽春仰藥固可傷帝且綴旒方播許莫將基禍尤黃星亦教遺臭爲高陵十功九錫成筭在地維遂裂天柱傾奮威死者無健者身不遭誅骨遭罵至憎甚欲及儲胥底用更求台上瓦發邱摸金將遺誰敢擬舜禹真其兒荒涼餘址圯未盡更煩漳水湍磨之秋風蕭蕭動衰草天幸無情天不老鳩居幾換未暇哀翻手周師戈又倒

三臺賦

至正三年九月二十四日有壬偕明初馬徵君游三台明初有長句旣次其韵永歌不足又作是賦其詞曰

歲癸未秋九月霜清寒薄天宇澄澈塗無長泥庭有積葉高陽子逸興作呻畢輟趣膏秣  
事登涉壺清露之芳醞從白眉之佳客乃渡清洄稅駕乎鄴覽山川之形勝弔陳跡之未  
減客乃指顛而相告曰子亦見夫三台之巖巖者乎冰井峙北金虎踞南銅爵巖巖中立  
而三若稽作者振古所懋欲祛我御不能縷談子亦欲聞其凡乎高陽子曰嘻昔有塗巷  
話古事及漢季小兒聞曹敗則大喜劉蹶則顰蹙而出涕蓋人心天理之所同况怒其人  
而覆其地因其跡而聲其罪不亦宜哉客乃言曰吉利之生姓不自知由嵩已冒夏侯何  
稽舞戟禦捕啖葛如飴誑草以疾拒客以泥睥睨一世岸然肆欺雖槁何之見異卒莫逃  
子將之譏謂興義以寧國致羣材之景隨而乃劫遷乘輿地尊天卑彝倫攸斁大廈以墮  
及乎袁尙旣敗審配亦摧黃星斯應赤精遂微入鄴領冀州之牧中天植不臣之基慮幾  
人之稱王乃居之而不疑幾簣幾杵成茲崔嵬子午梁貫愈出愈奇三山齧戴雙闕鳳飛  
連薨複道相爲蔽虧累植山積周軒雲齊陽宮冬熙凌室夏棲審曲面勢有巧無遺衡漳  
浩浩乎其北隆慮靡靡乎其西收千里於寸眸萃萬景於一時卷山河而匪席指風霆其  
在頤應劉王徐倡酬諏咨登高能賦家有陳思父子放志欲長若斯天道惡盈樂極則悲  
撫冲弱之季豹顛婉孌之蛾眉語託人而哽塞惟泣血之連瀉痛富貴之長違遽盡露其

情狀彼一牀之八尺容幾許之總帳要脯精於朝晡競聲樂於朔望分香衣而造履組舉  
瑣於屬續其橫槩賦詩之雄發壁弒后之威奄忽而俱喪匪不及乎篡代丕蓋定於主嚮  
鎖諸妓於幽闕望西陵之莽蒼念舊寵而興悲抑茹怨而自愴霜厲新秋露花泣春宰木  
行拱几筵有塵哀絃急管其聞不聞事往跡存如惡未泯夫以精舍二十年之規欲媒孽  
萬年之爲君不知司馬家兒已瞠乎其側而恥於附其翼攀其鱗也徒爲趙燕魏齊之張  
本因之增侈重困乎吾民幸疊障之不鏟但表惡於無垠今吾與子效小兒之顰蹙申欺  
孤之公議傾壺中之清醇澆胥次之醜磊且以酌漢室征西之將軍魏家創業之武帝子  
以爲何知高陽子聞而笑曰瞞乎瞞乎如客之言則爾之罪窮天地亘萬世而不可貰矣  
然誅則以心論言不以人廢乃歌其歌曰對酒當歌人生幾何憂思難忘唯有杜康於是  
引滿竭壺興盡而返回望三臺渺蒼茫乎醉眼

中書左丞許公釋機務歸鄉里與其友馬君明初游三臺倡和鏗鏘皆可傳者也公以  
詩未盡興又爲之賦瑰麗雄渾而議論嚴密寓誅討之筆視千二百年間騷人墨客之  
賦詠蓋無愧焉謹刻石於金虎臺道宮垂之永世且使姦雄情狀不可揜於天下後世  
者尤較著於構築之地繼游而誦之者亦足以快意云甲申歲夏月承務卽彰德路總



管府推官杜彥禮識

張景紹刊

案詩首唱題衡陽馬熙明初据至正集送蔡士安經歷次馬明初韻小註士安扁其讀書齋曰巢雲松今尋味詩篇紅蓮綠水地有餘菴逸不足朱衣紆游心遠慕有巢氏雲松况復如匡廬是明初潛德於斯可見矣明初與文忠唱酬見頗多此題諸石刻者其一也

彰德路刻漏銘

存八分書在府學明倫堂至正四年立

資善大夫□中書缺

翰林侍缺制吳□書

燕吳秉彝守相舉墜理焚期月就緒身施於政殆据至正集補無遺者器關平治復有資焉惟相地劇

民夥晨昏有禁鐘鼓之吏候据至正集補以臆公私趣事遲速無節過故滋敝吏則非矣亦由無所

考質而据至正集補至於斯也資屏糧屢前政是急正儀審漏有不暇焉吳侯懼事据至正集補之墮人之病也

旁諏其制則而治之八壺既陳一刻無忒銘屬於郡人許有壬以彰其勤以勗其繼以永

其制吁可以觀政矣銘曰

在昔觀漏水而制器也實惟軒皇開物混茫蒼姬秩職挈據至正集遠寢無節瞿瞿刺狂

沿襲曠代不胥以亡損益戾真寒暑補至正集昧洪殺景差短長爰折其衷咨冷孔良金

壺瀦清玉蚪引據至正集尾閣原於天潢盈科線出據至正集叩允符儀晷無間雨暘至

正集補統珠釋用聚椽亢折因夷據至正集吉康昏明示信率由天常信據至正集我治以滅焯

茲據至正集補承有元至正四年歲在甲申□月缺

案銘刻前列翰林待制吳名亦漫磨蓋吳炳所書也炳元史無傳文宗紀至順二年特命河南儒士吳炳爲藝文監典簿仍與對品階又見歸暘傳同里有吳炳者嘗以翰林待制徵不起卽其人也炳八分書深有古法漢淮源廟碑炳嘗重書偃師王輔嗣墓碣數大字亦炳所書今見於刻漏銘又其一矣碑云燕吳秉彝守相舉墜理焚期月就緒身施於政殆無復遺者亦一時之良也故爲首發其端以著於後

乾明寺記

存正書在城西南隅至正六年十月立

資善大夫前中書左丞知經筵事許有壬撰并書

予謝事歸里有寺曰乾明主僧德訓時過予旣乃相告曰佛居據至正集補西室中華事

之每窮土木之役然茅屋越席神亦安之亦誠而據至正集補已吾驕荒者怠驕與怠相

遭濟之以貧寺日廢矣訓祝髮事據至正集補佛主豐約不敢校歲久積楮幣為縿萬五

千有奇乃構大據至正集補雖殿像設興經始至正甲申三月落以乙酉十月雖據至正

足比隆傑利計佛亦與其誠而安之矣且訓見吾徒競錐刀如市商惟私據至正集補其身一旦捐健盡

以奉佛焉公不我廢故敢以告據至正集補其徒福神福成願紀於石相城故多寺由隋

迄五據至正集補季有興無廢周顯謂乾明者宋李回作郡志據至正集補始列乾明禪

時唐賜額者為寺私為據至正集補招提蘭若若山台野邑皆果樂此乎據至正集補昔

床把茅蓋頭未開以據至正集補武之禍由崇奉不能也居而能儉積而能散膏於身而豐

於佛懲其徒而矯其據至正集補亦賢乎哉今海內名山於眾因而利之據至正集補

佛之說高者凌青天深者入黃泉其淺而近者據至正集補曰不貧不窳訓也其庶乎故

擬其法之緒餘為之據至正集補記俾

至正六年歲在乙酉缺

案記石半剝殘以至正集校補其闕文始可讀所云予謝事歸里者元史有壬本傳父

熙載仕長沙日設義學訓諸生既沒而諸生思之為立東崗書院南臺監察御史茂巴

爾斯

舊作木  
八刺沙

緣睚眦怨言書院不當立并搆浮辭誣賊有壬並其二弟有儀有孚有壬

遂稱病歸四年改江瀾行省左丞辭六年召爲翰林學士既上又辭据是則有壬浮沉

閭閻凡數年故題銜稱前中書左丞至正改元時轉官也其階資善大夫傳佚此不書

記後云宋李回作郡志始列乾明禪院蓋宋元祐中刺史李琮命其子同撰相志十二

卷卽所謂郡志也當許文忠時此本猶存故得以稽據取信今無復存矣

刻漏銘碑陰

存正書在府學明倫堂

有元至正七年歲次丁亥三月旣望武節將軍彰德路總管府達魯花赤兼本路諸軍與

魯總管府達魯花赤管內勸農事沙刺甫丁臧吉太中大夫彰德路總管兼本路諸軍與

魯總管管內勸農事王琮奉政大夫同知彰德路總管府事普顏帖木兒承德郎彰德路

總管府判官馬德淳承務郎彰德路總管府推官姜彬承事郎彰德路總管府經歷國郁

將仕佐郎彰德路總管府知事王大本彰德路總管府提控案牘兼照磨承發架閣李宏

道建

案元史百官志諸路總管府達魯花赤一員總管一員此記沙刺甫丁臧吉王琮二人

其識並與史符但同知有普顏帖木兒而不載治中彰德爲下路故不置治中員又至元二十三年置推官二員專治刑獄下路一員此爲推官姜彬亦從下路之制也照磨兼承發架閣以記證之提控案牘又兼照磨承發架閣矣

### 靈泉寺香鑪識

案鑪識正書陰文在寺佛殿內文云大元廣平路磁州神慶安仁卿唐君卿王允中施香爐一鼎於彰德路神霄宮內獻用計重六十斤至正八年三月日匠人穆廣成造爐主陳鼎新穆彥溫保祐合家清吉元史地理志至元十五年改洛磁路爲廣平路總管府磁州仍隸焉此題云廣平路磁州與史合又神慶安仁卿攷神慶山名在州西四十里山海經所謂滏水出神菌之山也菌與慶同字

### 造石香鑪記

存正書至正九年七月在永慶寺

彰德路安陽縣天禧鎮祈福保安清信士李貴暨男李從吉於本鎮永慶寺

護國義勇武安王神位前敬發虔心建造石香鑪一座以保清吉今用資鳩工建造完成謹卜良辰恭詣供奉安置了畢惟王巍巍神武續漢朝百世之功蕩蕩英威立蜀國三分

之勳既功成於赫奕安享於綿綿今者酌之於後伏望歲時禱請願聖德之昭彰遠近祈求托威靈之感格自茲風調雨順國泰民安□之□不測之災合宅享大來之慶時太元至正九年歲次己丑七月吉旦

謹案

關帝神宇之盛起自宋而漸廣於元以余所得元統二年創建武安廟記在城西北隅觀音堂此又從天禧鎮永慶寺香亭石記以一縣之中石刻可見者如此其他廢毀無存益可推矣然考其稱謂頗不歸一元統二年者載崇寧護國真君義勇武安王此獨作護國義勇武安王當是土人相沿稱之不能如定號也

端公塔記

案塔記正書在靈泉寺石柱中行題洪辨通恬大師如意長老端公之塔左行有普修政行福慧元通真如妙道永濟亨明蓋紀其宗派如是右側題大元國至正十三年九月吉日立塔背正行了端卽端公也又有普宣普貴普進普順四人是爲了端之徒下稱師孫修義修善修賢修旺修定修成凡六人

勅賜贈翰林學士文獻杜魏公神道碑銘

有序

存正書至正十三年十月立

資政大夫御史中丞知經筵事臣馬祖常奉勅製文

中奉大夫侍御史知經筵事臣胡彝奉勅書字

翰林學士承旨榮祿大夫知制誥兼修國史知經筵事臣許師敬奉勅篆額

相之安陽縣王裕里有處士杜緱山墓既葬之五十六年當天歷己巳皇贈處士官翰林學士階資德大夫勳上護軍爵魏郡公謚文獻越六年元統甲戌皇又詔臣祖常製其墓之碑臣彝書其碑之字臣師敬篆其碑之額以賜曾孫臣秉彝使刻臣受詔□監察御史臣□□□序公□行□狀爲文曰公諱英□文□□先霸州人□將□□□試□□□□業文辭規進取而公獨自霸州之信安辟地河南緱氏山中於天下書靡不讀讀靡不記靡不見其趣詣上下今古於得□□□之□靡有不究其心皆無眾人之存而□□待於□金□□□□□□仕□□□走血氣不得寧而公獨閒關轉徙以詩書從容授徒汾晉間故中書粘合珪開府於相以書幣聘公至獨教以緩刑薄斂□學□士興□□弊以修□其民而□以□平□之□□□□□世祖觀政江南至相召公問計公對以謂漢唐以還天下之趨合安危顧法與食與兵三者而已國無法不紀人無食不命亂無兵不守

安陽縣志  
□□□之恃也□守□之殆□□矣□□□之□□□□□之在聖主天命必得今若控襄樊  
之師委戈下游以倒其背而無縮於銳是縣車東馬而大業定矣更勸上數事以爲事不  
爾後當如此上內之心賢公謂可屬以大用既皆如云江南平卽使至相徵公公聞王文  
統當國輒引避使索不見近臣奏起公□大名彰衛懷孟等路提舉學校官辭不就迺遭  
執政書其略曰□□□之道不明異端□說害之也橫流奔放天理人心不絕如綫今天子  
神武睿斷俊乂輻輳言無不內計無不用先王之典謨制度禮樂教化興明修復則維其  
時矣嗟乎薄書會期文法末節□□□所不□也執事者因陋就簡急急焉是務良用□  
□□善始□□□能善終今不能遡流求源以拯數百千年之禍恐後之弊將有不勝言  
者矣或諭使仕則曰後之世雖去古□世遠而先王之所以設施制度其本末先後未嘗  
有異也今不能因天下之□善以變夫後世之異政以趨合先王之意禁焉而已其勢豈  
易易復古哉吾又不能窺時俛仰以赴機繁之會仕奚從益於是杜門謝客□□窮學於  
世之貴富賤貧一無所動其心以優游□□於道藝以終其身以歿嗚呼公之言若此其  
尤可以窺公之志也其所著有春秋地里原委十卷語孟旁通十卷皇極引用八卷皇極  
疑事四卷極學十卷律呂禮樂雜志三十卷□集□卷其大略不以一身之窮而忘天下



之憂以爲不見其志於行事則將文以發其意文不克用於時則將以垂諸人後之人用吾言焉吾固不窮也公所爲作之意若此公□□□□始公之學也□所行迄□不得一□以止蓋亦遯世而不悔者歟其志如此其仕不至於耽祿而弊時審矣惜公之去而不試於事也公氣貌魁偉美須儀望之儼然爵祿器也既家於相中書畀以相之良田畝□不受公□居市街者言當有黃金家人欲發視公斥止之公去居者果得黃金百斤觀公之存於二事之廉若不足數然公之歿也既久其大者既已傳於世而其小者亦不得略也公以至元十年九月十六日終於家壽七旬終之日命諸子曰卽死當題我曰處士杜溪山墓□□之碑從公志也公會王父信王父植父時升金隱士妣張氏配孫先是東平遣使者奉書弊金馬聘公公未許夫人曰士不幸生亂世守土之臣各擅命招集天下之士以□彰弊□爲腹心一旦禍敗必有供賣同囚虜者矣公卒不行後果如言後公九年歿祔公墓追封魏郡夫人子男三人處思警悟才學甫冠卒處立郡文處學愿終東平路推官有惠政女適李氏孫男一人曰□處愿子也以子秉彝貴封承議大夫樞密院判官驍騎尉安陽縣子曰堅曰欽女孫二長適完顏從益次適王桓曾孫七人秉彝秉鈞秉直秉周秉容秉一秉德女孫鸞適徐紹祖元孫三人元監修國史椽如□□來孫燕京如

麟麟嗚呼公之事□矣故雖言公之言而所次上此然即此而公之爲人可見則亦豈得  
爲略哉秉彝爲奎章閣學士典籤博士兼經筵官與修皇朝大典嘗錄公之事以送太史  
今拜陝西行臺御史而天子又賜公之碑且詔還家立石相人見秉彝之來必曰是魏公  
厚積之勲有曾孫賢其將大未艾則不寧公有榮也秉彝□賢後嗣哉我國家褒卹寵嘉  
之意蓋益有徵矣故臣求其尤可以傳後世者序之而爲銘銘曰

明明世后皇聞於天我征徂南捷捷其陳建我干旄於洹之濱遑脂我車軌蒲殷殷魏公  
在野誰適與謀學以待世靡恫靡□維世后聖聘公於遺后曰公賢庶幾其來南國之痛  
我恭天紀鳳鳴在雲魚泳于汜億億臣□盡瘁以仕矧是藝哲寧不我有公拜稽首匪臣  
有辭降極□矣民殫胥疲誰唁臣者尙出位思大德受命昭徵靡遺□□□□□□觀國  
法與食兵燕民孔極宋嘻蔑矣孰其可遣帝御六師以匡不獲同我髦士蘭我戎行鈎援  
戟鍛以臨樊襄勿趨而待勿惡於揚鑣其餒俘涉自漢陽轟行騎翼咸予之域后納公言  
試靡有忒大命既集偃戈于革束帛詣公謂公來即彼何人斯公胡罔憚皎皎白駒在彼  
空谷考掣朝謳願言韞匱雖則□臣懋勳有倣完題壽考以綏後祿公□□□□以□□□  
□□□□□□乃□□□時有炳其云有鬱其聞璣絨璧露後公之文公生靡崇歿有多祉兆相

之郊從以孫子既六十年樹石墓趾天子之賜曾孫之美曾孫之美追崇孔多有列群獻公延爾那哀如之何矢詩不磨

中奉大夫中書參知政事同知經筵事臣秉彝奉勅立石

案碑新訪得之微有缺字前題資政大夫御史中丞知經筵事臣馬祖常奉勅製文祖常見元史本傳拜御史中丞與此同其階資政大夫知經筵事未之及又題中奉大夫侍御史知經筵事臣胡彝奉勅書字彝見馬祖常撰胡叅政墓碑景先子彝轉爲中奉大夫遷爲侍御史是也又題翰林學士承旨榮祿大夫知制誥兼修國史知經筵事臣許師敬奉勅篆額其文述杜瑛事元史悉採爲隱逸傳碑後題中奉大夫中書參知政事同知經筵事臣秉彝奉勅立石秉彝瑛之曾孫見順帝紀至正十三年四月四當以杜秉彝爲中書參知政事二月壬戌以參知政事杜秉彝並同知經筵事碑後列銜與史並合而史不爲立傳以碑按之秉彝爲奎章閣學士典籤博士兼經筵官與修皇朝大典拜陝西行臺御史皆其歷官可見者也皇朝大典當卽經世大典書已散佚獨見永樂大典中是秉彝嘗預編錄矣又前言故中書粘合珪開府於相以書幣聘公至獨教以緩刑薄斂云粘合珪不見年表蓋元初將相大臣年月疏濶簡牘未詳者則闕之

傳言開府爲相當據碑作開府於相

勸請萬空廣公長老疏

存正書在城內天寧寺至正十六年□月立

大都諸山勸請萬空廣公長老住持彰德路天寧禪寺大宏祖道上額皇祚者天球之在東序雖有方宜祖意之說西來要求元會矧曰宏揚任重敢云住持事繁萬空長老於物之多卽已也一自得有原之學便超無外夫方主開元旣放如是光明赴天寧必用這般手段色斯舉矣當類畫錦之行能無隱乎宜副同友之望時不可失慎勿讓爲

至正十六年□月□日本山監寺洪仁提點洪良立

天慶寺住持貴庵圓珍竹林寺住持西山惟賢報國寺住持雲峯圓會法寶寺住持恒山圓福海雲寺住持王峯文振延聖寺住持寶林福元寺住持頤庵寶集寺住持則堂普慶寺住持雲峯聖安寺住持雲山慧從慶壽寺住持鳳巖顯儀萬壽寺住持翠峯普林萬安寺釋教都壇主

案疏稱大都諸山勸請萬空長老云据元史地理志至元元年中書省臣言開平府闕庭所在加號上都燕京分立省部亦乞正名遂次中都其大興府仍舊四年始於中都

之東北置今城而遷都焉九年改大都疏所云大都謂此也其諸山則大都路領各州縣之寺略見此矣

□鄉北曲溝社下捨財施主孝子李珪等長供記

存行書在城內天寧寺至正十八年正月

夫人世施善者究未來消長窮已往曰革歸洞明旨趣盡師友道義但以施善者爲才能養善者爲德器悅善者爲珍寶發善者爲事業所以施於心則心樂施於身則身安施於家則家和施於國則國泰施善□爲不得虛生於一時矣故我釋氏大醫王以慈忍悲利示方便門誘引情品存亡兩益至焉實以初中後善三法以聞思修進趣六度與萬行中不思議之妙也施者有內外內以形體塵根外以財幣珍物皆爲功德母一段盛事也功德者可修而得之不修而弗得耳茲有曲溝社居李珪李珍李璧每思鞠育諦想恩懷恭伸克念之誠當啟尤憐之至昆季同垂商略詣於彰德在城大天寧禪刹施財伍仟緡收入常住庫每歲抽息飯眾以資冥福可爲誠施以自他方一也敬陳追悼亡父李德林亡母趙氏作生死二忌父五月二十一日生十月十七日滅母二月二十日生九月十五日滅謹按芳辰拔濟幽靈超嚴佛國次淚追修祖禰三代各化淨方輩眷見存枝榮獲福

刻石之殷永傳不朽

至正十八年正月吉日張景紹刊

知賓浩成侍者浩濟侍者洪喜直歲浩遇典座法喜副寺浩政副寺恒增副寺洪仙副寺洪詠監寺洪仁維那浩直久讀行雋藏主洪湛書記洪嚴監寺□性提點洪果提點洪良住持佛心圓應大禪師萬空長老□廣□

案記爲李珪兄弟所作施財長供以資亡親冥福愚夫之孝託以申誠未可云非也

邢尙書墓碑

佚

馬祖常撰

公諱秉仁字仁父起家丞相東曹掾授承務郎平江路推官未上改承直卽濟南萊安等處鐵冶提舉□遷承德郎江西行中書省左右司都事選充廣平彰德等鐵冶都提舉官外臺各以名薦尋爲撫寧路總管加亞中大夫廣平路總管凡十遷以禮部尙書致仕階承務郎至嘉議大夫凡六轉出委中外率稱官守初提舉濟南諸冶賦民不困通立後業都事江西行省婉畫直辭贊叶上下議遣官出廩米五十萬石賑貸屬州饑眾難之公謂

異日有擅發罪秉仁願獨坐萬□斷斷待鋪以活者不可指數也都提舉廣平彰德等諸  
冶差戶程功礦□悉給縮買殖貨以利予農冶辨爲最總管撫州□使臨門賜驛之官撫  
境地稅戶部賦木緯織布民病非所產卽令輸直吏不得舞手取賄公私俱便之小旱禱  
輒雨歲連大穰俗頗譁訐未幾民□健訟移廣平路教學者以雅樂祠事先聖孔子立鄉  
校七百各有弟子師課樹桑億萬計絲績用饒民有婦妬妾妊而以妾妻奴者夫死而族  
人欲有其家訟不決乃以子生月逆計母妻奴之時得實其民遂有後盜僞以小鈔貫文  
作大鈔貫文如錢取鎔燃註誤七十人止以首坐勸醫講黃帝越人書躬視惠民藥餌比  
去官民鮮天札者賦有寸帛之羨立歸之主旣致仕益礪志讀書強記不怠字書多楷法  
尤工古隸子溫由中書檢校官拜監察御史吏部中書左司二郎中總管大名河間都轉  
運使

案碑据鄴乘刪節本收入略見其概所云秉仁改承直郎濟南萊安等處鐵冶提舉元  
史百官志載有濟南萊蕪等處鐵冶提舉司疑此稱萊安者安爲蕪字之訛食貨志延  
祐六年始罷兩提舉司併爲順德廣平彰德等處提舉司所隸之冶云曰神德曰左村  
曰豐陽曰臨水曰沙窩曰固鎮今碑載選充廣平彰德等鐵冶都提舉是也然不言順

德者順德當未與廣平彰德併爲一是秉仁之爲都提舉在延祐前矣秉仁後移廣平路教學者以雅樂祠事先聖蓋卽禮樂志延祐五年命各路府宣聖廟置雅樂而秉仁能奉行之以淑其士民良吏之績莫著於茲然不附諸元史良吏之後採摭之疎也

胡叅政墓碑

佚

馬祖常撰

公諱景先字彥明少端默有遠操內自修飭不求當世譽事寡嫂盡禮畜其孤如己子人有貸錢爲本業子本相將至萬十數貧莫能償主責之棘多自經公捐資爲償之里人謝爲券質公所公火其券歲大侵出廩實以贖其鄉旣匱又賣田繼之至熟人將酬之不受盜有竊其牛羊者又竊所乘馬公知賊處不問人嘗具饌奉公公食而甘召庖人問之曰燔能澤濡能燻味奚是適庖對以法上下釜皆新鑄合肉其中密其款頂跡加火焉公曰母得釜損乎味於適而器於弊吾弗忍平居恂恂恭謹遇人無戚疏豁然無機噉或欺罔之不以變春秋高矣出入閤里常却車馬不御與故人父老遊或具几杖□□□鄉人尊之謂翁其長者謂其子弟必教以□□□致和元年卒年八十子彝由丞相作起□□□



部主事官十轉爲中奉大夫職十有二遷爲侍御史彝爲河南行省左右司員外郎河南大饑使先發廩者如繹省臣以格未卽許彝時代判省牘乃專發米三十二萬石所活五十萬餘人其爲河西隴右僉憲隴右地極邊吏往往闕略乾沒無所顧彝按摘姦賊墨坐者十有一人釋濫繫者八人沒□四百五十萬緡其爲右司都事有以西域僧卜兆言釋重囚以解除者中貴人傳旨引富人於當死者至內廷將脫械彝白宰相置之獄其爲御史爲員外郎左司所言於上悉同案所不能具不敢言者臨事裁決引大體略細故矯無所屈又聞其爲尙書戶部也天子人正大統故典親王宗臣庶官衛士錫予之數爲金幣穀帛以萬萬計時浹月間舉故典者再執事者請括金民間以充用時廷臣多是其議彝獨以爲不便乃稽諸內府之隱覆郡縣上供之實內帑藏積之羨不給則令鹽商入銀以準弊大朝會遂無闕事臣攝官御史中丞知經筵事實與彝同署又見其蟬翼憲紀糾繩官表入侍講幄考質經義究觀前世之變理亂興衰之際必委悉焉士論咸以誦彝而彝之語臣必曰魏公之教不敢忘意觀彝之事而質以其言蓋可以知公矣

案碑由鄴乘節錄非全本其載景先子彝歷官行跡爲詳彝見許文忠所作墓誌銘彝字安常雪楚其號也起家鄉校官轉大都路儒學錄中書叅議器其才辟掾府中歷儀

曹宥府爲中書右司掾除工部司程工部主事除河南行省員外郎省中有小人欲以權傾其僚公抗掇之力居多歲饑贛省臣擅發廩活饑者僉河西隴右道肅政廉訪司事行部涼州辯盜牛之冤而正賊吏之罰拜監察御史遷右司都事計事行在所張寶者陳言伏路左乘輿之馬爲驚將誅之抗議得免上都獄有殺人之夫者賂西僧將用佛法曲赦之公力陳其非卒正其罪陞左司員外郎尋除工部侍郎鄴州倉爲水所犯作渠分其勢公所董萬人夜忽舉火謀瀕同僚惶懼公但靜坐至旦繩其首眾復安役魏郡公訃至奔赴迄襄事羸毀骨立服除拜陝西諸道行御史臺治書侍御史太夫人迫之使行當關中大饑之餘甫事經畫而太夫人訃至旣葬遂廬墓側手樹松栢大作塋門甫大祥除江西湖廣道肅政廉訪使未行改戶部尙書請使交至鄉里榮之戶部兩遇朝廷有大故頒諸王費鉅萬計公建議以鹽易銀賜用以足拜治書侍御史陞御史旣歸除河南不行至淮東卽歸疾革盛服扶主教弟子家人覩縷明盡請郡侯杜公宏道與之訣又作詩留別其友五人有壬其一也治命柩以論語殉勿歛華美勿用緇黃言畢而逝事與馬祖常碑參證得其悉矣補元史者宜採及之

元故魯郡夫人趙氏墓誌銘

存正書年月殘今移置許文忠公祠內

國子監丞陳旅撰

中書參知政事安陽許公有壬之夫人趙氏缺善應征行大元帥贈開府儀同三司封秦

國公□□宣諱按竺爾之曾孫女蒙古漢軍元帥贈太□□榮祿大夫封梁國公諡忠

惠諱黑□之孫女缺大學士翰林學士承旨銀青榮祿大夫□□誥兼修國史中書平

章政事封魯國公缺女母□氏封魯國魯國大父本缺儒□氏趙□外祖氏也夫人□慧

而□□幼時□父□詩入耳輒能記七歲倍誦缺女事□論語孟子小學當□□誦矣魯

公之□□蜀省也□臣以公居中司□□其罪缺詔逮公繫請室夫人年十三卽却缺

凡三年日夕哭泣至翳其兩目缺遂明如初魯公文學政事重海內爲國元老□又賢明

選婿之稱難其缺進士廷對缺中書爲讀卷官見其對在□三等謂同列曰□言磊落可

行力爭之寘第二缺參政爲兩淮都轉運使喪偶□□魯公還缺因請昏於是夫人歸

□前缺女才三歲撫□如已出燕山缺婢嘗竊幣置□間缺以語參政參政曰何言之蚤

也缺知其必妄故不言也及事姑缺而姑卒終喪語□□流涕謂不得□婦缺

案誌石藏小營村趙成典家乾隆二十一年出土字多漫滅前列國子監丞陳旅撰旅

元史有傳至正元年遷國子監丞階文林郎又二年卒是誌石之作在至正元二年間矣史稱旅文典雅峻潔必求合於古作者有集四十卷今於此誌略見緒餘故益可喜也文稱中書參知政事安陽許公有壬之夫人趙氏缺善應征行大元帥贈開府儀同三司封秦國公缺宣諱按竺爾之曾孫女蒙古漢軍元帥贈太缺榮祿大夫封梁國公謚忠憲諱黑□之孫女缺大學士翰林學士承旨銀青榮祿大夫缺兼修國史中書平章政事封魯國公缺攷按竺爾本傳爾作邇其歷官拜征行大元帥延祐元年賜推忠佐建功臣太保開府儀同三司上柱國封秦國公謚武宣並與誌符子十人徹里國寶最知名國寶一名黑梓卽誌謂諱黑□者也爲蒙古漢軍元帥及封梁國公亦與誌同惟誌言謚忠憲而傳作忠定傳或有誤也下載中書平章政事已廢其名者卽黑梓子趙世延也傳載拜四川行省平章政事云帖木迭兒屬其黨何志道誘世延從弟胥益兒哈呼誣告世延逮世延置對至夔路遇赦云帖木迭兒更以他事白帝繫之刑曹逼令自裁世延不爲動居囚再歲誌所謂魯公之□□蜀省詔逮繫請室是其事也後又言進士廷對及中書爲讀卷官見其對在□□三等謂同列曰□言磊落可行力爭之寘第二缺攷至正集跋首科貼黃云賜宴玉堂知貢舉乃平章政事臣李孟讀卷參知政

事臣趙世延集賢學士臣趙孟頫皆坐禮方洽呼臣有壬前平章指叅政而語有壬曰  
始子策第高下未定叅政言觀此策必能官請寘第二甲吾不許寘上復擲下者至於  
再三又指集賢曰學士見吾輩辨不已乃立請曰宋東南一隅每取尙數百人國家疆  
宇如是首科正七品取多一人不多也乃從之蓋有壬被知遇之始本傳不載其事故  
予因此誌附著之

胡氏志石

佚

鄴乘云舊志作胡嵩正德末孝明村民得胡氏志石作景崧洪良□□□□  
住持佛心圓應大禪師萬空長老□廣□

案碑題□鄉北曲溝社据宋志曲溝管統村有南曲溝北曲溝今尙沿此名元杜秉彝  
撰高文忠廟碑濟洹水由曲溝至府灌田千頃是其地也李珪作長供薦其亡父母忘  
意於刻石之殷永傳不朽愚之甚矣

湯聖王廟碑

佚

河朔訪古記湯聖王廟在安陽縣西北五十里廟有少中大夫山東東西道按察使胡  
祇遜所撰碑

查本縣金石錄乃偃師武虛谷先生所著我博學考古家認爲善本此志之聲價概  
可知矣惟此書原本係木刻恐難無訛今隨續志而翻印校對時當然特別鄭重惟  
其中有像形古寫避諱通用等字如徽作儀鵬作臘悽作悽業作業寒與韓同等字  
類此者頗多校對遇此每加考慮但爲慎重原本存真起見未敢稍爲更易卽希  
鑒原

監校謹啟